


# MGA NGALAN NGA

## MASIPAD-ANON

 Salamat, Igsoong Neville. Medyo wala ko kini—wala ko kini gidahum. Wala unta ako dinhi karon. Pero, unyang gabii mao ang gabii sa komunyong, ug ako—ug nahunahuna ko nga moanhi ako karong buntaga. Ug gitawgan nako si Igsoong Neville, ug ang ingon niya, “Bueno, karon, kung moanhi ka,” ang ingon, “nganong dili ka na lang mamulong namo og diyutay?”

<sup>2</sup> Ug nahunahuna ko, bueno, kung moadto ako, ug posible man, nga dili ako magwali, pero mamulong na lang ko sa iglesia sa makadiyut mahitungod sa mga butang nga, kabalo na mo, nga sa hunahuna ko makapalig-on sa iglesia.

<sup>3</sup> Bag-o lang mi nakauli gikan sa among—gikan sa among tinglagas nga biyahe sa pagpangayam, ang mga igsoong lalaki ug ako, dinhi, ug nagkaaduna pud kami didto og mahimayaong kahigayonan. Kami—mapasalamatong kaayo kami, og kaming tanan napuno, ug—ug nadala pud namo ang mga gipangayam namo. Ug—ug ang atong pastor ug ako kabalo gyud mi nga ang karne sa lagsaw mao’y nindot, nindot kaayo. Ug mao nga nakakuha mi og maanindot nga lagsaw. Ug nakakuha ako og usa ka oso ug duha ka lagsaw. Ug namalik na mi.

<sup>4</sup> Ug kini na unta ang panahon nga magawali ako mahitungod niadtong ulahing pito ka mga Selyo. Ug wala pa nila maandam ang iglesia. Ug may kung unsang butang, nga babag, nga mao’y nagpahinungdan niadto. Nga, sa hunahuna ko nagapalisud sa ato ang siyudad, tungod kay wala’y igong parkinganan para sa gidaghanon sa mga tawo nga atong. . . nga mahimong mag-igo sa simbahan.

<sup>5</sup> Gusto nato og bag-ong simbahan nga matukod dinhi, ug aduna na kita og igong kantidad sa kuwarta nga gigahin para niana, ug—ug aron nga makapatukod og usa—usa ka mas daku nga simbahan. Para pag aduna kita og ingon niini nga mga panerbisyo, bueno, masabtan n’yo na kung unsa kini. Makaluluoy gyud nga kahimtang. Ang mga tawo anaa na daplin sa mga bongbong, didto sa gawas sa ulan, ug—ug—ug daw sa dili makapahimuot kana. Ug adunay mga kritisismo nga naggikan sa ako mismong mga higala. Miingon, “Igsoong Branham, mora’g kinahanglan sila. . .” Higala ko nga doktor mismo, ang miingon, “Mora’g kinahanglan nga maggahin ka na og ubang maayong lugar.” Miingon, “Naluoy gyud ko, sa dihang nagaagi sila.”

<sup>6</sup> Ang usa ka nars nga silingan nako, miingon, “Bueno, napaagi ako didto usa niana ka buntag sa alas singko. Gidahum

nila nga atua ka na didto . . .” Ug ang ingon, “Nanagtapok na ang mga tawo palibot sa simbahan didto, sa alas singko sa buntag. Gipaabot ka nga maatua na didto sa alas nuebe-traynta.” Busa, kita n’yo, ug kana ang hinungdan kung nganong malisud gyud.

7 Ug gusto nato sa simbahan nga mas luag, ug kon diin daghan ang makalingkod. Ug nahunahuna nato nga nagakinabuhi na kita sa katapusang mga adlaw, og nagatoo gyud kita niana. Nga kon diin . . . Kinahanglan natong tudloan ang Iglesia sa—sa—sa niining mga butanga, nga nagakaporma na, ang mga butang nga ginapropesiya kaniadto, nga ang uban sa mga niini, linibo ka tuig na ang milabay. Ug sulod sa halos baynte-singko ug traynta ka tuig, kadtong mga gipropesiya kaniadto, gikan mismo niining iglesia, nga mamahitabo gayud. Ug karon makita nato kini nga nagakahitabo na. Busa angay gyud natong bag-ohon kining mga butanga, tungod wala man gud ta’y igong lugar. Busa niining buntaga . . .

8 Gihatagan nako og panahon ang mga tawag sa ako ug ingon-anang mga butang, kagahapon, ug adunay uban pa nga akong atimanon, karong hapon, ug uban pa. Ug dayon adunay uban pa nga akong bisita nga gustong makighimamat, usa ka hiligugmaong batan-ong lalaki, nga ginaatake sa pagkanerbiyos, usa ka igsoong lalaki nga ministro sa pagpangmisyon. Ug uban pa nga ingon niana, ug usa ka igsoong lalaki nga taga-Norway. Ug—ug nagkaaduna kami og gamay’ng pagpakighinabi didto sa likod nga lawak. Ug miingon ko, “Bueno, karon, manggawas na ta.”

9 Ug ang ingon ni Igsoong Neville, “Bueno, manggawas na ta ug magsulti og pipila ka mga pulong para mapalig-on og diyutay ang Iglesia.” Ang un- . . .

10 Usa sa unang mga butang nga gusto nakong isulti. May gisulat akong pipila ka mga butang dinhi sa papel, nga, sa pag-anhi nako dinhi sa simbahan, mao’y gusto kong isulti. Ang usa ka butang nga gisulat ko dinhi mao ang mahitungod sa pagpanaw sa atong maabiabihong Igsoong Taylor samtang wala kami dinhi.

11 Nagatambong si Igsoong Taylor niining simbahan sa daghan nang mga katuigan. Kitang tanan nakaila niya, sigurado ko niana. Pero kung may mga bag-ohan dinhi, siya’y usa ka maabiabihong tigulang og buotang-tawo nga kanunay kamong pangitaan og lingkuranan, aron makalingkod mo. Si Igsoong Taylor, katapusang higayon ko na diay kadto nga makita siya, hangtud nga makita ko siya pag-usab nga usa na ka batan-ong lalaki, nagatindog siya didto sa pultahan mga tulo o upat na ka Dominggo ang milabay. Ingon niya, “Gusto kong makabaton og pipila ka mga libro, Igsoong Branham. Gusto nakong ipang-apod-apod ang maong mga libro.” Mao nga among, siya . . .

12 Sa nasabtan nako, may diabetes siya ug na-coma, ug wala . . . wala siya kabalo nga may diabetes diay siya. Ug—ug mao nga . . .

Namatay siya. Sa ubang bahin wala gayud siya namatay. Kondili miadto lamang siya aron makauban si Ginoong Jesus.

<sup>13</sup> Ug siya'y matinud-anon, maayo kaayong igsoon, kanunay'ng mahunahunaon sa ubang mga tawo. Ug ang kalipay niya mao ang mapangitaan ang uban og lugar nga malingkuran, pagmanganhi sila sa simbahan. Ug kabalo mo, siguro, pagmakatabok na kita ngadto sa Pikas, dili ba maanindot nga makita nato si Igsoong Taylor didto, nga mapangitaan niya ta og lugar nga malingkuran, didto sa pikas?

<sup>14</sup> Sa hunahuna ko, sa paghandum kang Igsoong Taylor... Wala man gud ko dinhi niadtong paglubong kaniya, aron unta makapamulong kauban si Igsoong Neville, pero gusto kong magpahayag og pipila ka pulong sa akong pagpasalamat, sa iyang biyuda. Si Igsoong babayeng Taylor, siguro, ania siya sa kung asa man niining buntaga, panalanginan ang matinud-anon niyang kasingkasing!

<sup>15</sup> Si Igsoong Taylor, aduna siya'y gisulti usa niadto ka adlaw, "Umari ka ug duawon mo ako. Aduna baya ko'y gihimo nga gamay'ng lim-aw didto, nga gibutangan ko og pipila ka isda, para makaadto ka ug makapamingwit." Kanunay gyud niyang gihunahuna ang ubang tawo. Ug adunay Usa mismo nga gihunahuna siya, nga mao si Cristo, para hatagan siya og kaluwasan.

<sup>16</sup> Sa tan-aw ko, isip paghandum, man lang, para sa niining iglesia, samtang nagatigum kini isip usa ka lawas karong buntaga, manindog kita, iduko ang atong mga ulo sa atubangan sa Dios.

<sup>17</sup> Among Langitnong Amahan, kami isip nga mga tawo karong buntaga, ug—ug mga mananambong sa niining dapit nga pagasimbahan... Ang Imong halangdon nga kamot nagpanglihok sa among taliwala ug gikuha gikan kanamo ang usa sa pinakabilihong igsoon namo nga gimahal namo, ug nahibalo nga Imo siyang gihigugma. Ug Ikaw adunay rason alang niining tanan, Ginoo, kay kondili dili unta kini mahitabo sa ingon niini nga paagi, ingon nga hingsayran namo nga nagasulti kanamo ang among Biblia, nga, "Ang tanan nga mga butang masigtabang alang sa ikaayo niadtong mga nahigugma sa Dios." Ug kana gyu'y gibuhat niya.

<sup>18</sup> Ug mitan-aw kami sa palibot, sa kalibutan, ug makita namo nga ang kinaiyahan sa tanang paagi nagasulti kanamo, nga dili siya mahimong mapapabilin sa lubnganan, tungod kay sa ibabaw niining yuta iyang gituman ang katuyoan kon nganong Imo siyang gipadala dinhi aron buhaton. Usa siya ka maayo, matinud-anong igsoon.

<sup>19</sup> Nakita namo nga sa kinabuhi sa kinabuhing botanika, ug sa kinabuhi sa adlaw nga nagasubang kada buntag aron hatagan kami og kahayag. Ug sa udtong tutok anaa na kini sa tunga-

tunga nga panuigon. Ug dayon pagkagabii nagakamatay kini pag-usab, aron mosubang na pud pagkasunod buntag, nga presko ug bag-o, tungod kay gituman man niini ang katuyoan sa Dios.

<sup>20</sup> Makita namo ang mga bulak sa dihang nagapanglimbukad ang mga niini ug ginapatahum ang yuta ug ginadayandayanan ang mga pasilyo sa punerarya, ug mga lugar sa kasal, ug ginatuman ang katuyoan niini; nga ginaablihan ang mismong kasingkasing niini ug ginahatag, nga walay bayad, ang dugos niini ngadto sa putyokan, ug ingon nga pahumot para sa mga lumalabay, ug katahum para sa mga nangita. Ginahatag mismo ang tanantanan niini, sa pagpangalagad alang sa Dios, pagkahuman iduko na lang niini ang gamay niyang ulo. Pero pagmoabot na ang tingpamulak, manglimbukad kini pag-usab, tungod kay ginatuman niini ang katuyoan sa Dios.

<sup>21</sup> Mao nga sa atubangan sa tanang kinaiyahan, ug sa Biblia, ang saad, ug sa Balaang Espiritu, kami adunay kalipay nga makapagmaya sulod sa among kasingkasing, sa pagkahibalo nga ang among Igsoong Taylor, sa samang paagi, Ginoo, gituman niya ang katuyoan sa Dios. Ug ang pagsulti nga dili siya mabanhaw mao'y pagsalikway sa among Biblia, pagsalikway sa among Dios, ug sa tanang butang nga gikahatag kanamo sa Dios nga palaabuton, ingon nga mga nahibalo nga adunay pagkabanhaw. Mao nga gilauman namo ang panahon nga makita namo siya pag-usab, nga siya'y batan-on na ug himsog ug dili na gayud magkasakit o matigulang man.

<sup>22</sup> Panalangini ang iyang bililhong asawa, nga matinud-anon gayud nga kapikas niya. Mamahimong handumanan na lang namo sila, nga sa dugay nga panahon, Ginoo, makita namo sila kaniadto nga magkakuyog nga nagaadto sa lim-aw, ug nagalingkod sa gagmay'ng mga bangko didto, nagapamasol, ug nagaistoryahanay, ug kung unsa ka tinuod gyud sila nga managhigugmaay.

<sup>23</sup> Ug karon nahibalo kami nga adunay dakung Adlaw nga umalabot, sa dihang ang mga bayani sa pagtoo managmartsa ilalum sa dakung arko sa kadaugan, ug ang mga Manulonda sa . . . nga pun-on sa mga alawiton ang kahanginan. Mamakita namo sila pag-usab nianang lugara.

<sup>24</sup> Hangtud nga moabot kana nga panahon, Ginoo, hatagi kami og kaisog. Panalangini kami ug tabangi kami. Pagamingawon gyud kami kang Igsoong Taylor, ug ang tanan nga mananambong niining iglesia, madumduman siyang nagatindog dinha sa may pultahan ug mangita siya og lugar para sa nangabot aron manalinghug sa Pulong sa Dios, aron nga sila makalingkod nga hamugaway ug malinawon.

<sup>25</sup> Niadtong miaging adlaw sa dihang siya'y mitabok na, Ginoo, giampo ko nga ang bantugang Arkanghel sa Dios nagtindog

didto sa pultahan, para pangitaan siya og usa ka lugar, usab, Ginoo, ug aron siya'y makalingkod usab. Tungod kay nahisulat man diha sa Biblia, "Ang mga maloloy-on makabaton og kalooy." Hangtud nga makita namo siya pag-usab, Ginoo, hinaut nga ang maong mga handumanan magapadayon nga matamis sulod sa among mga kasingkasing, hangtud sa umalabot nga adlaw nga magkitaay pag-usab kami didto sa pikas Yuta. Pinaagi sa Ngalan ni Jesus Cristo amo kining gipangamuyo. Amen.

<sup>26</sup> Kanunay gyud siyang mahandum sa atong taliwala ug taliwala sa mga bag-o pa lang, ug uban pa, nga nagatambong sa atong simbahan, o sa atong bilding dinhi, aron magsimba. Hinaut nga ang iyang kalag mopahulay na sa kalinaw diha sa atubangan sa Dios, hangtud nianang Adlaw.

<sup>27</sup> Sa umalabot nga adlaw, usab, ang matag usa kanato mopanaw pud, ang tagsa-tagsa, hangtud nga turno na nato nga moabot nianang puntoha. Bueno kita, samtang aduna pa kita'y panahon, ug kahigayonan, andamon na nato ang atong mga kaugalingon para sa maong umaabot nga kahigayonan; kay wala man kita kabalo kung kanus-a ba kini mahitabo. Wala pud ta kabalo kung kinsa ang sunod. Busa magkinabuhi kita, nga sa matag adlaw, nga kung moabot man kini, nga kita na ang sunod, andam na kita.

<sup>28</sup> Karon, gusto ko lang mag-anunsyo. Karon, sa dili madugay, tingali, siguro, wala ko pa naistorya ang mga tinugyanan sukad niadtong nakabalik ako, mahitungod sa kahintang sa bilding sa—sa simbahan dinhi, o kung unsa ba ang angay natong sunod nga buhaton, sa pag-andam sa atong simbahan para makapahigayon na ta og panagtigum. Dayon maipadayon na nako, pasayloa ako, ang mahitungod sa—sa Pito ka Selyo, ug dayon ang Pito ka Panaksan, ug daghan pang mga butang nga kinahanglan natong mahisgotan, sa gilayon.

<sup>29</sup> Ug karon, sa sunod Domingo sa buntag, didto ako, sa Elizabethtown, Kentucky, sa ila ni Igsoong L. G. Hoover, para sa usa—usa ka panerbisyong paghalad. Ug kana para ididikar ang usa ka bag-ong tabernakulo, o usa ka tabernakulo nga gipalit nila didto sa Elizabethtown, Kentucky. Didto mismo sa dalan 62 hangtud nga makaabot ka sa Elizabethtown, o didto sa, diay, sa 31, o didto sa expressway. Dayon mogawas ka sa gawasanan, diretso ka na sa Elizabethtown. Mga usa ra ka oras. Mga anaa sa traynta'y-singko, kwarenta ka milya ang biyahe padulong didto. Siguro, mga kwarenta ka milya gyud, kung moagi sa . . . sa 31, ug mga anaa sa traynta'y-singko ka milya, o mga ingon niana, kung moagi ka, sa expressway. Anaa ra kini sa Mulberry Street.

<sup>30</sup> Panerbisyong paghalad. Si Igsoong Hoover ang sa regular nga Sunday school sa alas diyes. Ug ako ang magwali sa maong

panerbisyong paghalad, gikan sa alas onse hangtud sa alas dose, sa sunod nga Dominggo, sa ika-onse sa Nobyembre.

<sup>31</sup> Dinha sa paskinan, adunay—adunay artikulo sa pagpahibalo mahitungod niini. Ug didto ako sa . . . Masubay n'yo na ang agianan gikan didto. Anaa ra kini sa Mulberry Street. O ilang—ihatag nila ang mga direksyon bahin sa . . . Anaa na kini dinha sa paskinan atubangan sa simbahan.

<sup>32</sup> Dayon, sa—sa Nobyembre sa—sa ika-baynte-dos, ako—didto na sab ko sa Shreveport, Louisiana, sa ika-baynte-dos, ika-baynte-tres, ika-baynte-kuwatro, ika-baynte-singko, ug—ug ika-baynte-sais. Lima ka adlaw, sa tan-aw ko, sa Shreveport, Louisiana, didto sa Life Tabernacle. Didto kana kang Igsoong Moore. Magasaulog sila sa ilang bulawanong jubileo. Mikunsad kaniadto ang pentecostal nga panalangin didto sa Shreveport, Louisiana, singkwenta ka tuig na ang milabay, sa ika-baynte-dos niining bulana. Singkwenta na ka tuig, nga ang unang pentecostal nga mensahe giwali. Ug mikunsad, mikunsad ang Espiritu Santo, didto sa Louisiana. Ug nagapahigayon sila og pagdumdum niana, ug kini mao na ang bulawanong jubileo. Ug ako ang mamulong sa niining jubileo, lima gyud ka gabii, didto sa ila ni Igsoong Moore, sa Shreveport, sa Life Tabernacle.

<sup>33</sup> Kung aduna mo'y mga higala didto ug atua ra sa palibot, aba, nga gusto ninyong sulatan, o unsa man, ikalipay gyud namo nga makatambong sila. Ug ipahibalo lang kanila ang mahitungod sa maong umaabot nga mga panagtigum.

<sup>34</sup> Ug ang Life Tabernacle, kung kinsa man sa inyo ang nakaadto na sa ila ni Igsoong Moore, siya usa ka talagsaon nga tawo. Ug aduna pu'y talagsaon nga pundok sa mga tawo didto, mga buotan nga mga taga-Habagatan. Dili gyud ninyo sila malabwan sa pagkabuotan. Ug busa, ang Life Tabernacle, bisan kinsa sa palibot sa Shreveport makasulti sa inyo kung asa gyud kini. Ang Shreveport anaa sa mga duha ka gatus ka libo ka mga tawo. Ug maanindot kini nga siyudad, ug daghan ang puedeng mga kapuy-an. Busa . . .

<sup>35</sup> Ug ang maong tabernakulo usa ka daku nga tabernakulo, daku kaayo nga tabernakulo. Aduna kini og hataas nga andana, ug mga balkonahe, ug may labing dakung andana, ug dayon adunay usa pa ka andana. Ug adunay halapad nga espasyo. Ug atbang mismo niana adunay awditoryum sa siyudad nga makapaigo og lima ka libo nga lingkuranan. Didto—didto mismo sa tabok lang sa dalan, ang awditoryum sa siyudad.

<sup>36</sup> Ug si Rev. Jack T. Moore, o—o ang Life Tabernacle didto sa Shreveport, Louisiana. Magsugod kana sa ika-baynte-dos. Kana'y sa Miyer- . . . Huwebes hangtud sa Dominggo. Huwebes, Biyernes, Sabado, Dominggo, upat ka adlaw imbes lima. Pasayloa ko. Kana mao ang ika-baynte-dos, ika-baynte-tres,

ika-baynte-kuwatro, ug ika-baynte-singko. Sa tan-aw ko mga ingon niana, sa niining—niining Nobyembre.

<sup>37</sup> Ug dayon, mahibaloan nato kung unsa na, kung unsa na ang nahimo nato dinhi sa simbahan, aron mahibaloan kung unsa na'y estado sa simbahan nga mapabarug na kining bildinga. Ginasulti sa mga kontraktor kanamo nga makabutang kono sila og igong mga trabahante niini, nga sulod kono sa mga napulo ka adlaw makakuha na sila og mga tawo para mapasugdan na nato kini, kita n'yo, sa gilayon. Ug ginahulat na lang nila ang siyudad nga mopirma. Kabalo na mo, ug kinahanglan man gud nato nga magbutang og ingon ka halapad nga parkinganan, ug ingon usab ka daghan *niini*. Ug, oh, grabe, daghan lang red tape nga ginaagian, para mapasugdan ang pagpatukod og bisan unsa. Pero gusto ko lang makabalik sa iglesia sa dili pa ako moadto sa natad sa pagmisyon pag-usab.

<sup>38</sup> Karon adunay tawag sa ako nga paadtoon ko sa Tanganyika, Uganda, ug sa mga lugar didto. Giandam na ni Joseph ang mga panagtigum nga magsugod sa Pebrero.

<sup>39</sup> Ug kagahapon, sa pag-abot nako, dihay pipila ka mga igsoon, ug si Igsoong babayeng Thoms ug sila, nga gikan pa sa gawas-nasud, nga nangabot. Ug adunay . . . Nakakita ako'g papel nga anaa sa akong pultahan, o—o usa ka imbitasyon gikan sa usa ka—usa ka asosasyon didto sa South Africa. Busa nagasulat ako kanila, para mahibaloan mismo kung unsa ang puedeng buhaton. Siguro, samtang atua ako sa ingon niana ka halayo, puede akong mohapit sa South Africa, siguro, sa katapusang bahin sa Pebrero ug Marso, mga ingon nianang panahona.

<sup>40</sup> Ug nagalaum kita nga mapabarug na ang simbahan, para mahisgotan na nako kining mga Kapanahonan sa Iglesia, sa dili pa—sa dili pa magsugod ang tingtugnaw, kung mahimo. Kung dili man, o ayha na lang pag nakabalik na ako gikan didto, kung magdugay pa si Ginoong Jesus.

<sup>41</sup> Nagapaminaw ako kagahapon samtang aduna ko'y ginaatiman, nagatoo ko adlaw kadto nga dili pa kagahapon, sa teyp. Nagtoo ko nga nadungog ko gani kini nga ginapatukar dinhi karong buntaga. Adunay gamay'ng igsoong lalaki nga taga-Habagatan . . . Ang iyang mama mitambong sa panagtigum. Aduna siya'y malala na nga tumor sa iyang dughan, ug gilandongan na siya og kamatayon. Ug ang Balaang Espiritu, sa usa sa bag-ohay lang gipahigayon nga mga panagtigum, didto sa Southern Pines, nagtoo ko didto nahitabo kini, o kung asa man, gisulti sa iya, gisulti ang mahitungod sa iyang malala na nga tumor, ug kung kinsa siya, ug kung taga-asa siya. Ug ang ingon niya nga may anak kono siya nga lalaki nga usa ka backslider, ug kini nga lalaki maaksidente, ug ikiha tungod sa

pagpatay. Ug daghan pang mga butang nga ingon niana. Ug kini nga tawo. . .

<sup>42</sup> Nahitabo kining tanan nga eksaktong ingon niana. Ug ang malala na niyang kanser, o malala niya nga tumor, diay, mibiya kaniya. Nga sa karon, pagmalala na ang bukol usa na kini ka kanser, kabalo na mo. Mao nga kini—kini mibiya kaniya. Ug ang batang lalaki gikiha tungod sa pagpatay, ug nahitabo gyud ang tanan sumala sa pagkasulti mismo niini sa Balaang Espiritu. Ug ang maong batang lalaki nakabig ngadto kang Cristo, pag-usab. Ug girekord niya kadto sa teyp, ug akong—nadungog ko nga ginapatukar kadto. Nagustohan n'yo ba kadtong gamay'ng, makalipay'ng taga-Habagatan nga pinulongan? [Nagaingon ang kongregasyon, "Amen."—Ed.] Miingon, "Dinhi sa North Carolin'er," ingon niya. Oh, ganahan gyud ko niana, kanilang mga taga-Habagatan. Ug aduna siya'y. . . Gipanalanginan gyud siya sa Ginoo. Ingon niya, "Kabalo ko nga ginasulti mo nga dili ka magawali og doktrina, Igsoong Branham; sa kongregasyon mo lamang." Miingon, "Kabahin man kami sa imong kongregasyon." Busa buotan kaayo siya, nga masulti kana.

<sup>43</sup> Ug karon adunay retrato dinha, sa tan-aw ko, siguro, nga nakapaskil na dinha sa bulletin board karong buntaga. Kung ugaling wala pa, ipaskil kini ni Billy dinha. Mahitungod kini sa daghang higayon ko na nga nasulti, niadtong nagsugod akong mamulong, nga nanagsulti sila, "Hunahuna mo lang kana, Igsoong Branham, nga nakita mo kanang Kahayag, kanang Kahayag." Tingali, halos. . .

<sup>44</sup> Siguro aduna pa'y mga nahabilin dinhi, nga mga karaan na nga nagatambong ang nakahinumdum niadtong, sa wala pa nakuhaan. Kini og retrato. Aduna pa ba dinhi ang nakahinumdum nga ginasulti ko kadto, dugay na nga panahon? Tan-awa. Mga upat o limang kamot na lang. Si Igsoong babayeng Spencer dinhi, ug si Igsoong lalaki ug Igsoong babayeng Slaughter, ug—ug ang igsoong lalaki *dinhi*, ug igsoong lalaki pud *dinha*. Adunay lima o unom nga mga dugay na nga nagatambong ang nahabilin.

<sup>45</sup> Bueno, karon, wala magdugay, kadtong mekanikal nga mata niadtong kamera ang nakakudak niadtong retrato. Busa gipadala kadto sa Washington, DC ug miagi sa mga tigsusi, ug niadtong nakabalik, "Wala gyud kono'y double exposure o kung unsa man." Ang ingon, "Miigo gayud ang maong Kahayag sa lente." Si George J. Lacy kini. Makita n'yo nga nagpirma siya mismo. Kita n'yo?

<sup>46</sup> Bueno, dayon, makadaghang higayon ninyong madungog, makita ug nagasulti, "Adunay mangitngit nga landong sa ibabaw *niining* tawo. Nalandongan kini og kamatayon." Pila na ang nakadungog nga ginasulti ko kana? Daghang mga higayon,



kita n'yo, daghang mga higayon. Bueno, nahitabo mismo nga nakudakan kadto sa kamera. Ug busa aduna kita niini dinhi.

<sup>47</sup> Ang gining nga nag-adto sa usa ka igsoong babaye ug nagsulti kaniya, sa panagtigum didto sa—sa Carolina, kon diin nagkaaduna kami og usa ka maanindot nga panagtigum didto sa Southern Pines. Ug didto, ang gining naghimalatyon na tungod sa kanser sa duha niya ka suso. Ug misurender na ang mga doktor kaniya para mamatay. Ug ang gining mikab-ot sa iyang kamera ug gi-retratohan siya, niadtong higayon mismo nga gisulti ko kaniya kung kinsa siya, ug kung taga-diin siya. Ug miingon ko, “Adunay mangitngit nga landong sa ibabaw mo. Nalandongan ka og kamatayon.” Ug gikuhaan mismo kadto sa maong gining og retrato. Ug nakuhaan kini sa mekanikal nga mata sa kamera, nakudakan ang landong sa kamatayon.

<sup>48</sup> Kung kinsa kaninyo ang nakatan-aw na sa *The Ten Commandments*, ug nakita kadtong manulonda sa kamatayon, kung giunsa niadto pag-agi, kadtong mangitngit mismo, mangiub-ang-hitsura nga landong, anaa na kini sa retrato. Ug sa tan-aw ko nakapaskil na kini diha sa bulletin board karon. Kung wala pa, madungog man ako ni Billy, sige, ginapapaskil ko kini sa iya diha sa bulletin board. Ug adunay pangtudlo nga nagatudlo ngadto sa maong tawo. Ug kadtong tawo, kadtong landong mibiya niadtong babaye, ug milagrosong naayo. Apan adunay usa ka mora'g tabon, usa ka maitum nga aso nga nagpalibot ug gitabonan ang maong gining, ug nga nagabitay nga ingon niana gumikan niadtong kanser, gumikan niadto. Siyempre, mao kana ang landong kon diin nagaabot ang kamatayon, usab, gumikan sa kanser.

<sup>49</sup> Bueno, bisan unsaon pa ninyo sa pagpaningkamot nga isulti sa mga tawo ang Kamatuoran, aduna gyu'y magduda sa gihapon nga Kini dili Kamatuoran. Ug kung kanunay ninyong ginasulti ang Kamatuoran, kung ingon-ana kabalo kamo nga kamo'y—kamo'y husto.

<sup>50</sup> Aduna ko'y amigo nga usa—usa ka ransero, didto sa Kasadpan. Ug—ug ang konserbasyon didto nagbayad og mga upat ka libo ka dolyares para sa usa ka snowmobile, para ihapon kadtong panon sa mga lagsaw'ng-elk nga nahibilin didto sa Troublesome Valley. Si Mr. Jeverez nga ania naglingkod karon sa simbahan, naagak ko siya ngadto kang Cristo, usa siya kaniadto ka bug-os nga wala-nagatoo. Ug nadungog n'yo na nga gisulti ko kadtong estorya nga magkauban kaming magsakay sa kabayo kaniadto. Ug ayaw niyang motoo kaniadto og bisan unpa gawas sa mga etiko ni Darwin. “Ug kanang Masuso, nga gipanganak-sa-ulay, binuang kono kana.” Ug nagkampo mi niadtong miaging gabii niadtong gidawat niya si Cristo.

<sup>51</sup> Ug busa gisulti kanila sa niining lalaki. Ang ingon niya, “Bueno, dili ninyo kinahanglan nga paliton kana nga sakyanan,

kanang snowmobile.” Miingon, “Masulti ko sa inyo sa eksakto kung pila ka lagsaw’ng-elk ang atua didto.” Miingon pa, “Adunay dise-nuebe.” Miingon, “Adunay baynte- . . . Adunay baynte-uno, ug napatay ko na ang duha kanila.” Ug nakigsulti siya ngadto sa tanod sa pagpangayam. Usa ra man gud ang puede niyang patyon. Busa miingon siya, “Adunay baynte-uno, ug napatay ko ang duha kanila. Mao nga dise-nuebe na lang ang nahabilin.”

Ug miingon ang tanod, “Oo, Jeff, kabalo ko nga napatay mo ang duha kanila.”

Ingon niya, “Lagi.”

<sup>52</sup> Bueno, gidala nila kadtong snowmobile, nagpadulong didto sa ibabaw, adunay dise-nuebe nga ulo sa lagsaw’ng-elk. Ingon niya, “Billy, isulti mo man sa usa ka tawo ang kamatuoran; dili gihapon niya kini toohan.”

<sup>53</sup> Busa ingon niana gyud kini. Isulti mo man sa mga tawo ang Kamatuoran, ug bisan pa niana sila . . . Daghan na man gud og tipas-nga-pagsabot ug—ug pagpamakak mahitungod sa mga butang hangtud nga dili na sila motoo nga Kamatuoran ang ginasulti mo sa diha nga isulti mo ang Kamatuoran kanila. Nakita n’yo?

<sup>54</sup> Pero mapasalamaton kaayo kita nga aduna kita’y Langitnong Amahan Nga ginapamatud-an kana nga Kamatuoran nga may kapanghimatuoran. Tinuod kana. Busa kung kini na ang katapusang adlaw ko dinhi sa yuta, ang . . . bisan ang mga siyentipikanhong panukiduki ug mga pruweba nagpamatuod nga ang gisulti ko mao ang Kamatuoran mahitungod niining mga butanga. Husto kana. Kini ang Kamatuoran. Tingali napaskil na kini sa bulletin board. Billy, anaa ka ba dinha sulod sa lawak? Daladala mo ba, ang retrato? Ug kung dala mo, bueno, dalha kini dinhi, dayon ipaskil kana dinhi, tingali makita na nila kini. Bueno, wala ko kabalo. Magbutang siguro sila og suga dinha sa—sa board.

<sup>55</sup> Ug ania ang—ania ang retrato mismo dinhi. Siguro dili ninyo kini makita. Pero *ania* mismo makita ninyo kanang mora’g turong nga landong sa kamatayon ibabaw sa ulo sa maong babaye. Ug ania ang artikulo mahitungod niini *dinhi*, kon diin nakudakan kini sa babaye, ug para makita kung kini ba’y aktuwal nga nagpakita. Ug anaa kini dinha, nga—nga anaa dinha. Usa kini ka mora’g pandong nga landong sa kamatayon.

<sup>56</sup> Tan-awa ninyo ang babaye, kanang usa diha? Nakita mo na kini, siguro, Igsoong Neville, dili ba? [Nagaingon si Igsoong Neville, “Oo.”—Ed.] Uh-huh.

<sup>57</sup> Busa, tingali ipaskil kini ni Billy diha sa bulletin board, kung mahimo mo, Billy. Ari ka, kuhaa nia, ug dalhon mo sa atubangan ug ipaskil mo dinha sa paskinan, para makita kini sa tanan sa paggawas nila. Siya o si Doc, si kinsa man sa inyo.

Karon nahunahuna ko, siguro, basin aduna pa'y makapa-klaro niini para makita ninyo og ayo, pero daghan ra kaayo og dulom nga bahin sa klase sa niini nga retrato. Pero ipaskil gihapon niya dinha, para nga makita ninyo kini, sa paggawas nila.

Karon, hinumduman pud ninyo ang tanan nga mga pahibalo.

<sup>58</sup> Ug karon, niining buntaga, nahunahuna ko nga siguro mamulong kita og diyutay'ng bahin mahitungod sa usa ka butang nga makapadasig sa iglesia, usa ka butang nga makahatag sa inyo og labaw pa. . .

<sup>59</sup> [Nagaingon si Igsoong Doc Branham, "Gusto mo isentro dinha ang suga?"—Ed.] Unsay sulti mo? ["Gusto mo bang isentro dinha ang suga?"] Oo, Doc, kung mahimo mo. Maayo tingali kana.

<sup>60</sup> Gusto kong gamiton kini dinhi. Aduna ko'y. . . Ang uban kanila wala niini maisentro, niadtong miaging semana, busa nahunahuna namo nga siguro himoon kini nga mas maayo para sa karon. Gusto kong hisgotan ang mahitungod niini, tungod kay kini may kalabotan sa—sa damgo sa usa ka igsoon nga babaye.

<sup>61</sup> Nahunahuna ko kung si Igsoong babayeng Shepherd ania ba sa simbahan karong buntaga. Nahimamat ko siya sa miaging gabii. Ug kadtong unang higayon nga nakita ko kadtong babaye, sa tinuod lang, wala ko nakaila kung kinsa siya. Ania ba siya? Siguro wala siya. Oo. Okey lang ba, o mahimo kaha nga dili-maayo, kung maghisgot ako mahitungod sa nianang damgo, Igsoong babayeng Shepherd? Okey lang ba kaha, nimo? Sige. Okey lang.

Ug sa dili pa nato hisgotan kana, atong iduko ang atong mga ulo karon pag-usab.

<sup>62</sup> Maloloy-ong Langitnong Amahan, sa Imo ginahatag namo ang pagdayeg tungod sa tanan Nimong pagkamaayo ug kalooy. Ug karon, ipa-hilum kami, Ginoo, nga mahimo namong tun-an ang Pulong sa buhing Dios, sa diha nga nagaabot Kini kanamo pinaagi sa panan-awon ug gipamatud-an sa Balaang Espiritu, og gipaluyohan sa Biblia. Busa nagaampo kami nga Imo kaming hatagan og pagsabot, aron mahibalo kami kung unsa ang buhaton niining katapusang mga adlaw sa dihang makita namo ang dautang mga gahum nga nagapalibot na namo karon. Ang gubat, ang katapusang gubat haduol na kaayong ipahigayon. Tabangi kami, Ginoo. Ingon nga mga tinuod nga manggugubat, nga lig-on, tugoti kaming ipapabilin nga nakataas ang taming sa Pagtoo, dala ang Pulong sa Dios, ang Espada, ug padayon nga nagamartsa. Sa Ngalan ni Jesus. Amen.

<sup>63</sup> Karon, nahunahuna ko ang padayon nga pagmartsa, sa pagpakiggubat, sama sa usa—usa ka gubat nga gihan-ay na, nakaandam na nga ipahigayon, usa—usa ka tinuod nga pagpakiggubat, para ipakigbugno ang bugno nga iya sa pagtoo.

<sup>64</sup> Si Igsoong babayeng Shepherd dinhi, ug si Igsoong lalaking Shepherd, nga maloloy-on kaayo nga mga higala nato, ug mga nagatambong dinhi sa tabernakulo. Ug sila'y bililhon nga mga anak sa Dios. Ug—ug kining si Igsoong babayeng Shepherd, niadtong gikuha ko ang akong surat, kadtong mga matang sa surat nga puede rang aksyonan ni Billy, sama sa ginasulti nga, “Padad-i ko og ingon niini kadaghang mga prayer cloth.” Ug ginaampo ko ang mga niini. Dayon siya ang magatubag pud sa ila. Pero pag mahitungod sa indibiduwal na nga surat, ako na mismo ang motubag, nakita n'yo. Busa gikuha ko kadtong indibiduwal nga surat, ug mao nga dala-dala ko kadto paingon sa balay. Ug nabasa nako didto, ang ingon, “Gikan kang Igsoong babayeng Shepherd.” Ug mahitungod kadto sa damgo nga nadamgohan niya, mga—mga pipila na ka bulan ang milabay. Ug dili niya kadto masabtan sa husto hangtud sa duha o tulo na ka Dominggo ang milabay, sa dihang nagtudlo ko niining—niining *Pito Ka Mga Kapanahonan Sa Iglesia* ug—ug ang—ang pito ka bunga, diha sa Ikaduhang Pedro, kung giunsa nga, sa Ikaduhang Pedro 1, “Nga igapuno sa inyong pagtoo.” Kita n'yo?

<sup>65</sup> Una, ang pinaka-pundasyon, mao'y Pagtoo. Ikaduha, igapuno sa inyong pagtoo, ang kaligdong; sa inyong kaligdong, kahibalo; gikan sa kahibalo, pagpugong sa kaugalingon; gikan sa pagpugong sa kaugalingon, pagpailub; sa pagpailub, pagkadiosnon; ug gikan sa pagkadiosnon, paghinigugmaay nga minagsoon, pagbati nga inigsoon; ug dayon gugma, ingon nga batong-pangtaklub. Pito sa maong mga butang. Pito ka mga kapanahonan sa iglesia, kita n'yo, ug pito ka bitoon sa mga kapanahonan sa iglesia, ug ang tanan niini gihiusa sa Balaang Espiritu.

<sup>66</sup> Karon, mao kana ang gikinahanglan para mahimong usa ka alagad ni Cristo. Gitukod ni Cristo ang Iyang Iglesia sa pito ka mga kapanahonan sa iglesia; ang Iyang Pangasaw-onon, usa ka Persona, babaye, Iglesia. Ang Pangasaw-onon gilangkub ug mao ang tibuok pito ka mga kapanahonan sa iglesia. Ang uban gikan *niini* nga kapanahonan, ug ang uban gikan pud *niana* nga kapanahonan, ug ang uban gikan pud *niana* nga kapanahonan, ug pag hiusahon ang tanan, ug ginaporma niini ang usa ka piramide.

<sup>67</sup> Sama ni Enoch, nga nagtukod sa mga piramide, nga mao'y pagtoo nato. Ug ang batong-pangtaklub wala sukad naibutang sa ibabaw niini, tungod kay gisalikway man ang pangulong-bato. Ug ginahisgotan nato kini karon, dili ingon nga Doktrina, kondili aron nga masabtan, para sa iglesia mismo dinhi. Nga kining mga . . .

<sup>68</sup> Ginahingpit sa Dios ang Iyang Kaugalingon diha sa tutulo. Ginahingpit Niya ang Iyang Kaugalingon diha sa “Amahan, Anak, Espiritu Santo,” tulo ka mga opisina sa usa ka Dios. Ginahingpit Niya ang Iyang Kaugalingon diha sa

“pagpamatarung, pagpabalaan, bautismo sa Espiritu Santo,” sa hingpit, nga mga buhat sa grasya. Gihingpit Niya ang Iyang Kaugalingon sa tutulo nga mga pag-abot: sa unang higayon, aron tubuson ang Iyang Pangasaw-onon; sa ikaduhang higayon, aron dawaton ang Iyang Pangasaw-onon; sa ikatulong higayon, diha sa Milenyum na kauban ang Iyang Pangasaw-onon. Ug ang tanantanan gihimong hingpit sa tutulo. Ug ang pito mao ang numero sa pagsimba sa Dios. Ang Dios gisimba sa pito, gihimong kumpleto, karon gihimong hingpit ug kumpleto.

<sup>69</sup> Ug ang talagsaong butang mao nga, dili para isal-ot lang kini, kondili para maipakita sa inyo, kadtong katapusang lagsaw nga napagayam ko adunay lima ka tumoy sa usa ka bahin ug tulo pud sa pikas; kita n’yo, grasya ug kahingpitan.

<sup>70</sup> Karon himatikdi n’yo kini, nga si Cristo. Nagsulat ang Dios og tulo ka Biblia. Ang unang Biblia mao ang kalangitan, nga gitawag nga zodiac. Karon, kung wala mo kabalo sa Basahon ni Job, kalimti n’yo na lang kini, tungod, tungod kay si Job mao ang nagasaysay mismo niini, kung unsa nga mihangad siya ug gihinganlan niya kadtong mga butanga sa kalangitan.

<sup>71</sup> Ug matikdi n’yo, sa zodiac, unsa man ang sugod dinha? Ang unang butang sa zodiac mao ang ulay. Ang katapusang butang sa zodiac mao ang Leo nga leon. Ang unang pag-anhi ni Cristo, pinaagi sa ulay. Ang ikaduhang Pag-anhi, Leo na nga leon, ang Leon nga banay ni Juda.

<sup>72</sup> Dayon gikumpleto ni Enoc sa panahon niya, o niadtong panahona, ang piramide. Ug kadto mao’y. . . Siyempre, wala na kita’y oras aron maghatag og konteksto bahin niini ug ipakita kung sa unsang paagi gitukod kadto nga piramide nga may mga lawak ug uban pa. Direkta kining nagahisgot mahitungod sa katapusan nga panahon karon. Anaa na sila sa lawak sa hari karon, sumala sa sukod niadto. Pero ang pangulong-bato wala pa sukad gibutang ibabaw sa maong piramide. Ug hingpit gyud ang pagkabuhat niadto, basi sa arkitektura, o—o masonry. Hangtud, nga bisan ang. . . bisan ang gamay’ng manipis nga hait sa labaha. . . Wala sila kabalo kung giunsa sa mga tawo kaniadto pagtukod niini, dili nila kini masabtan, nga dili mo gani mahimong sal-otan og manipis nga labaha ang tunga niadtong mga bato kon diin gibutangan unta kadto og semento. Ug walay semento nga gibutang niini. Pagkahaum gyud kaayo, ang pagkapatong-patong sa mga bato.

<sup>73</sup> Mao nga ingon niana pud kini sa dihang si Cristo ug ang Iglesia nahimong usa. Wala gyu’y semento sa matag dinugtongan. Wala gyud og unsa mang butang sa taliwala; ang Dios lamang ug ang tawo. Ang Dios, si Cristo, ug ang indibiduwal.

<sup>74</sup> Karon, pero, ang pangulong-bato, wala pa nila kini nakaplagan. Kabalo mo kadtong Stone of Scone nga aduna

sila sa England, para mag-ordena og mga hari, o para—para koronahan sila, ug kung unsa pa. Pero ang pangulong-bato . . .

<sup>75</sup> Tan-awa n'yo ang kuwartang papel sa America. Makita ninyo kung . . . diha sa kuwartang papel sa America, sa kilid niini, sa wala nga bahin, anaa ang selyo sa Amerika, usa ka agila nga adunay . . . mga bangkaw diha sa kuyamas niini, dinha pud sa ikaduhang kilid, mao'y gitawag nga selyo “sa Estados Unidos.” Pero sa sunod nga kilid mao ang piramide ug, sa ibabaw niini, usa ka dako nga mata, ug sa ubos niana nagaingon kini, “Ang halangdon nga selyo.” Nganong ingon niini man “Ang halangdon nga selyo” sa niining nasud, nga labaw pa gani sa selyo sa atong nasud? Kita n'yo?

<sup>76</sup> Bisan unsa pa ang inyong buhaton, ginapasulti gyud gihapon kini sa Dios. Kita n'yo? Ginapasulti Niya bahin niini bisan mismo ang makasasala. Ginapasulti Niya ang nasud mahitungod niini. Ang tanan kinahanglan nga magsulti mahitungod Kaniya. Bisan inyong—toohan n'yo man Kini o dili, anaa na Kini mismo dinha.

<sup>77</sup> Karon, himatikdi n'yo, aduna dinha og mata, ang mata sa Dios. Ug tungod nga wala pa gibutang ang pangtaklub, ang Pangulong Selyo, tungod kay Kini gisalikway, nga mao ang Anak sa Dios; ang Ulohing-bato sa bilding, ang Pangulong Selyo sa piramide, ug ang tanan niini. Karon—karon, akong . . . Ayaw kong . . .

<sup>78</sup> Usahay ginatelyp nila kining mga butanga, ug kini nakaabot sa taliwala sa mga kaigsoonan sa mga kaiglesiahan, sa ubang mga simbahan. Ug sa dihang nakaabot sa ila kana, ang maong mga kaigsoonan usahay sayup ang pagkasabot niini, nga may ginasulti kono ako nga kung unsang butang mahitungod sa mga kaigsoonan. Pero wala man gyud. Ako . . . Kung maminaw lang unta kamo ug sabton og ayo, kita n'yo, wala gyud ako nagasulti batok kang bisan kinsang igsoon. Tungod kay, dili kana maayong buhat sa mga kaigsoonan, nga magsulti'g mga butang batok sa usa'g usa. Kinahanglan nga magsulti kita para sa usa'g usa, dili nga batok sa usa'g usa.

<sup>79</sup> Pero kung maghisgot ako usahay mahitungod sa usa ka organisasyon, sama sa Presbyterian, Methodist, o uban pa, ginaingon nila, “Kita n'yo, siya'y batok gyud niini.” Dili ako batok sa igsoon nga lalaki didto, o sa igsoong babaye didto. Ang sistema nga nagabulag sa panag-igsoonay mao ang butang nga akong ginabatokan. Usa ra ka pamilya ang mga anak sa Dios, ug dili—ug dili lainlain nga mga grupo.

<sup>80</sup> Ug ang uban kanila nagasulti, “Dili ko makighilambigit niana, tungod kay Presbyterian man kana. Ug ako'y Methodist.” Kita n'yo? Bueno, dili angay'ng ingon niana. Kita n'yo? Ang sistema man niana nga organisasyon nga mao'y nagabungkag sa panag-igsoonay. Kita n'yo?

<sup>81</sup> Karon, kana, sama sa nasulti ko na, pananglitan nagapamidpid ka sa suba sakay sa usa ka karaan og gubaguba na nga sakayan, gipaningkamotan mo nga labangon ang busay, ug kabalo ko nga dili kana magmalampuson, bueno, kung ingon-ana, dili kini nga ginasinggitan, og ginasaway ta ka. Ginapaningkamotan ko lang nga mapahigawas ka sa maong sakayan. Kita n'yo? Tungod kay, kanang sakayan mabungkag gayud, ug—ug—ug mabiyaan ka didto, nga ikaw na lang, sa tubig. Busa—busa dili kadto—dili kadtong igsoon nga anaa sa sakayan, pero ginasinggitan ko ang maong igsoon para ipakita kaniya kung unsa ang sigurado gyud nga mahitabo.

<sup>82</sup> Bueno, kining tanan nga mga sistema, nga nahimo sa mga tawo ingon nga ila konong kalampusan sigurado gyud nga mangabungkag. Ingon niana gyud. Kinahanglan nilang... Kinahanglan natong moabot sa panaghiusa, sa panag-igsoonay. Mao kana ang dugay ko nang tuyo sa kinabuhi nga paningkamotan nga mapahiusa ug dili magbungkag og unsa man nga organisasyon, basta isalikway lang nila ang ilang mga ideya, ug mamahimong mga igsoon sa matag Cristohanon nga natawo na pag-usab. Nakita n'yo? Kana, kana ang akong ideya. Dinha kon diin ako nagbarug, bueno, karon, kung nakamatikod ang mga kaissoonan niini. Akong...

<sup>83</sup> Daghan sa atong mga kaissoonan, bisan sa laray nato nga Full Gospel, dili sila motoo nga ang Baptist ug mga Methodist, ug ang Lutheran ug sila, adunay kahigayonan. Pero, karon, siguro husto sila. Pero dili ako uyon niana. Nagatoo ako nga ang kapanahonan dinhi, bahin sa Kapanahonang Lutheran, sa niining kapanahonan *dinhi* nga gitawag nga, nagatoo ako, ang Kapanahonan sa Sardis. Ug dayon ang Kapanahonan sa Philadelphia, para sa mga Methodist. Ug dayon ang Pentecostal, ang Kapanahonang Laodicea. Nagatoo ko nga mga kapanahonan kana. Ug ang Dios, sa matag usa nianang mga kapanahonan, mikuha og mga tawong pinili. Ug, sama sa gisulti diha sa Mga Hebreohanon 11, nga, “Dili sila mamahingpit nga wala kita.” Kita n'yo? Pero karon ang Iglesia nagagikan *nini*, nagagikan sa minoriya sa tanang panahon, hangtud nga nagpadayon Kini ngadto sa kapanahonang Pentecostal.

<sup>84</sup> Karon, ang hinungdan nga ginasulti ko kini, para makakuha kamo og ideya bahin sa kung unsa ang gidamgo sa maong igsoong babaye. Ug ang iyang damgo nagatandi gayud sa butang nga akong dugay nang ginatudlo.

<sup>85</sup> Matikdi ninyo karon dinhi, karon, kining tanan nga mga butang nga ginasulti sa inyo sa Unang Pedro sa ika-6 ug ika-7 nga bersekulo, gi-...pinaagi sa inyong pagtoo, kana ang una. Karon, ginasulti ko nga adunay mga tawong nagaangkon nga aduna kono sila niining maligdong nga batasan nga wala gani matawo pag-usab. Ug sa hunahuna ko nakasulti ako og mabagison nga pamulong ug ang ingon ko, “Sama kini sa

usa ka maitum nga langgam nga nagapaninguha og ayo nga masul-oban ang iyang kaugalingon og balahibo sa pabo, ug ginahimong pabo ang iyang kaugalingon.” Dili niya mahimo kini. Kinahanglan nga natural nga balahibo ang motubo gikan kaniya. Kinahanglan nga ang kinasuloran niya ang magpagawas og ingon niana nga balahibo.

<sup>86</sup> Ug sa kanunay, ug dugay na akong giakusahan nga estrikto kaayo sa atong mga igsoong babaye, mahitungod sa mugbo’g buhok, ug pagmeyk-ap sa tibuok nilang nawong, ug mga ingon nianang butang. Dugay na akong giakusahan nga estrikto kaayo sa atong mga igsoong babaye. Kini—dili kini tungod nga aduna ako’y unsa mang batok niana. Wala ko magsulti nga ang babaye dili maayong babaye, nga siya’y taga-kalye o kung unsa man. Dili ingon niana ang akong kinaiya. Pero, ingon niini kini, kung siya’y magbutang og daghang artipisyal sa gawas, ginapakita lang niana nga daghan siyang artipisyal sa kinasuloran, kita n’yo, kon diin siya kinahanglan nga mapuno ni Cristo. Tungod kay, kanunay’ng ginapakita sa panggawas kung unsa ang anaa sa kinasuloran. “Pinaagi sa ilang mga bunga mailhan mo sila.” Nakita n’yo? Ug kon diin unta gikinahanglan nga maanaa si Cristo, ug aron may kaikag siya para sa Dios, ug may kaikag para sa uban pang mga butang imbes sa daghang artipisyal nga pagpagawal, ug kabalo na mo, berdeng mga meyk-ap sa mata, ug dili na tawo-ang-hitsura, ug tanan nang matang sa mga ingon niana. Dili gyud ko uyon niana, ug nagatoo ako nga ingon niana pud ang Biblia, busa ang gusto nakong mamahimo mao’y sa kung unsa ra gyud kita.

<sup>87</sup> Matikdi ninyo, karon, kung ang babaye wala’y mga kuko sa tudlo, ug gusto siya magbutang; kung wala siya’y mga ngipon, ug nagkinahanglan siya; wala siya’y bukton, ug kinahanglan ninyo; wala mo’y buhok, ug kinahanglan ninyo; wala mo’y ingon niini nga mga butang, lahi pud kana. Pero kung ibton n’yo ang inyong tinuod og maayo pa nga ngipon, tungod lang kay dili sila ingon ka puti nga inyo untang gusto, nan sayup kanang gibuhat n’yo. Kung pula ang buhok mo, ug gusto mo’y itum, ug moadto ka didto ug pakoloran kini og itum, tungod lang niana; sayup ang gibuhat mo. Oo, sa tan-aw ko. Pero ang pinakamahinungdanon nga butang. . . Wala ma’y Kasulatan para niana. Kana lang ang, pagpapatul sa inyong buhok, adunay Kasulatan para niana, oo, daghan mismo, busa gusto natong siguradohon nga husto gyud kana, karon.

<sup>88</sup> Karon, ang atong igsoong babaye, sa pagdamgo niya, nagdamgo siya nga siya’y. . . Bueno, una, nabalaka gyud siya. “Unsa ma’y pulos sa pagpadayon, ug maningkamot sa pagpakigbisog sa kinabuhi, kung ang gikinahanglan kanato sa Dios mao’y madawat ang Espiritu Santo ug wala kita Niini?” Karon, sa hunahuna ko dili. . .

<sup>89</sup> Siguro ginatayp nila kini. Pero kung dili man. . . Kung



ginateyp man nila, para lamang kini sa iglesia. Kita n'yo? Karon, ug kung aduna ma'y igsoon nga makakuha og kopya niini, ug madungog mo ang akong tingog, igsoon, mahitungod niini, hinumdumi, nga sa akong iglesia ko lang kini ginatudlo. Imong sa kanunay, atubangan sa imong kongregasyon, susiha ninyo ang—ang maong mga teyp, ug kung dili mo gustong ipadungog kini sa imong kongregasyon, ayaw kini ipadungog sa ilaha. Pero gapaningkamot lang ko nga mamulong sa niining gamay nga pundok dinhi, nga—nga si Igsoong Neville ug ako, pinaagi sa Balaang Espiritu, naningkamot nga—nga pagapastoran ug tudloan sila.

<sup>90</sup> Karon, adunay pipila sa niining mga pagtudlo nga tingali dili gyud kamo uyon. Busa kung aduna man, sama sa kanunay ko nang ginaingon mahitungod sa pagkaon og piniritong manok, “Pag bukog ang mausap mo, dili man ninyo ilabay ang manok. Kanang bukog lang ang ginalabay n'yo.” Busa ingon niana ang kanunay n'yong buhaton. “Pag nagakaon mo og cherry pie, ug dayon adunay liso, dili man ninyo ilabay ang pie. Kanang liso lang ang ginalabay ninyo.” Busa ingon niana pud ang buhaton ninyo sa pagpaminaw Niini.

<sup>91</sup> Bueno, ako—nagatoo ko nga—nga ang—ang hinungdan kung nganong daghang kalibog karon, mahitungod sa Balaang Espiritu, mao'y wala kini naitudlo og husto. Nagatoo ko nga ang bautismo naitudlo. . . ug ginasulti lang “ang bautismo.”

<sup>92</sup> Pero ingon nga sama lang kana nga ginasulti mo “sakyanan.” Pero karon aduna ko'y pipila ka mga mekaniko sa niini nga simbahan, ug wala ko'y nahibaloan og bisan unsa man bahin niini. Busa kung masayup man ako, mga igsoon, ako'y. . . Hinumdumi ninyo, dili man ako mekaniko. Kinahanglan adunay mga coil, ug mga plug, ug mga point, ug mga balbula, ug tanang uban pa, nga mao'y molangkob sa sakyanan.

<sup>93</sup> Ug kung hisgotan ninyo ang mahitungod sa bautismo sa Balaang Espiritu, daghan gyud ang kauban Niana. Huh? Kita n'yo? Daghan gyud ang nagauban Niana. Ug ania sa tan-aw ko ang ginapamatud-an sa Dios: nga ania karon ang Balaang Espiritu. Kita n'yo?

<sup>94</sup> Karon, ang sulti ni Pedro, una, “Pagtoo.” Karon matikdi ninyo og ayo kini karon. Itudlo nato kini sulod sa pipila ka minuto. Pagtoo, karon, kana ang una ninyo. Ug igapuno sa inyong pagtoo, ang kaligdong; sa inyong kaligdong, kahibalo; sa inyong kahibalo, pagpugong sa kaugalingon; sa inyong pagpugong sa kaugalingon, pagpailub; sa inyong pagpailub, pagkadiosnon; sa inyong pagkadiosnon, paghinigugmaay nga minagsoon, pagbati nga inigsoon; ug dayon gugma. Ug si bisan kinsa man nahibalo nga ang gugma Dios. “Ang Dios gugma.” Kita n'yo?

<sup>95</sup> Karon, mao nga, gikan niini, ug dayon dad-on kini ngadto sa pito ka mga kapanahonan sa iglesia. Ang Dios nagahulma, diha sa pito ka kapanahonan sa iglesia, og usa ka Pangasaw-onon para kang Cristo; sa pagsubay sa Filadelfia, Tiatira, ug Pergamo, ug Esmirna, ug Efeso. Usa ka kapanahonan sa iglesia, nga gisulti ni Jesus, “Kung ang—kung ang Pamanhonon moabot man sa nahaunang pagtukaw o sa ikapitong pagtukaw, ang tanan niining mga ulay mahigmata.” Sila mismo. Mahigmata sila, ang mga ulay sa Efeso, Esmirna, Pergamo, Tiatira, Sardis, Filadelfia, ug Laodicea. Namatikdan n’yo ba kana? Didto sa ikapitong kapanahonan, nga Siya’y miabot ug gipukaw kadtong nangatulong nga mga ulay. Kauban na ang tanan niana hangtud *dinhi*. Kita n’yo? Tungod kay, niini, sa tanang mga katuigan, mga kapanahonan, Siya’y nagahulma og usa ka Pangasaw-onon, natawo nga usa ka Pangasaw-onon, gipanganak nga usa ka Pangasaw-onon dinhi sa yuta para kang Cristo. Ug sa samang paagi nga Iyang gipanganak kining Pangasaw-onon, Iyang gipanganak pud ang maong mga indibiduwal.

<sup>96</sup> Karon hatagan ko kini og konteksto, para makita ninyo sa dihang ginasaysay na ang damgo sa maong igsoong babaye.

<sup>97</sup> Karon, kining mga butanga kinahanglan hingpit gayud nga anaa sa Cristohonon sa dili pa sila selyohan sa Espiritu Santo, sa dili pa kini motaklub sa ibabaw ug maghimo og usa ka kumpletong yunit.

<sup>98</sup> Karon, ang damgo sa igsoon natong babaye karon. Nabalaka man gud siya kung siya ba adunay Espiritu Santo o wala, sa dihang mihigda siya sa sopa kon diin nagabasa og mantalaan ang iyang bana. Ug aduna siya’y gagmay’ng mga bata, sama sa akua, ug kanunay silang magsaba-saba ug ingon-anang mga butang. Ug busa, dinha, nakatulong siya sulod sa mga diyes minutos, o kinse. Ug nagdamgo siya. Ug dili niya kadto masabtan, o mapagdugtong-dugtong man lang, sulod sa usa ka tuig na ang milabay, halos, hangtud nga naitudlo kining Mensahe. Dayon, samtang ginatudlo ko Kini, nadumduman niya kini tanan. Ug nagdamgo siya nga nag-ampo kono siya.

<sup>99</sup> Nagalakaw kono siya sa salog, una, sa wala pa siya magdamgo, ug ginapisil-pisil ang iyang mga kamot, ug naghunahuna, “Ginoo, naangkon ko na ba ang Espiritu Santo? Mahimo Mo bang pamatud-an sa ako. Ang uban moingon man gud, ‘Tungod nga—nga ako nakasinggit.’ O ang ingon sa uban, ‘Tungod kay nagsulti man ako sa ubang mga pinulongan.’ Ug nagatoo kami nianang tanan. Pero naangkon ko na ba gyud Kini?”

<sup>100</sup> Nagatoo ako sa tanan nianang mga butanga, nianang maligdong nga mga pamatasan, pagsulti sa ubang mga pinulongan, ug pagsinggit, ug sa tanang matang sa pagpasundayag. Ginatooan ko ang matag tipik niini. Pero

bisan kung aduna pa kini dinha og wala pud *Kini*, aduna gyud sa kung unsang sayup. Kita n'yo? Karon, kita n'yo, nakita n'yo, kamo—kabhang lang ang aduna kaninyo. Matikdi n'yo.

<sup>101</sup> Ug nabalaka siya bahin niini, busa mihigda na lang siya didto sa sopa kon diin nagbasa ang iyang bana, ug nakatulog siya.

<sup>102</sup> Ug nagdamgo siya nga atua kono siya sa usa ka bukid. Ug sa niining bukid, ang pinaka . . . Wala ko nadala kadtong papel, pero mora'g ingon niini kadto. Gidamgo niya nga nakakita kono siya og usa—usa ka batong kahon, nga mora'g—mora'g usa—usa ka gambalay, nga atua nahimutang ibabaw niining bukid. Ug anaa lang sa luyo niya ang iyang bana. Ug aduna siya'y nakita nga usa ka dakung lalaki nga nagatindog didto, nga nakasul-ob og pangtrabaho nga sinina, nga gilukot ang mga manggas, nga nagasag-ob og pinaka lunsay'ng tubig nga nakita niya sukadsukad, ug ginabubo kadto niadtong kahon, sa batong kahon nga atua nahimutang ibabaw sa bukid. Ug dili mapabilin niadtong batong kahon ang tubig. Ug nagaagas ra kini gikan didto, ug ginaanod niini ang tanan nga mga basura ug mga sanga, ug tanan na nga atua didto, ug gipang-anod kadto ug midagayday paubos sa bukid. Ug midagayday kadto sa iyang tiilan, ug atua siya mismo taliwala niadtong butanga, wala lang kadto mipabilin kaniya.

<sup>103</sup> Ug—ug dayon gipangutana niya kung nganong ang tubig dili mapugngan niadtong kahon, ug ang lalaki miingon, “Dili kini tubig. Ang Espiritu Santo kana, ug,” miingon, “wala gyu'y makapugong Niini.” Ug miingon, dayon mibalik ang lalaki ug mikuha og usa na usab ka daku nga balde, ug puno kadto sa dugos, ug gibubo ang dugos didto, miingon, “Karon mapugngan na niini kini.” Ug gihunahuna sa igsoong babaye nga kadtong kahon, kadtong usa ka batong kahon, mobuak ug mayabo ang dugos, pero wala gyud. Sa kaulahian ningtaput kadto ug nakuptan gyud kadto.

<sup>104</sup> Milakaw na ang igsoong babaye ug milugsong sa bukid. Sa paglugsong niya sa bukid, mihunong siya sa tiilan sa bukid ug milingi balik. Nakakita siya og lima ka agos sa lunsay, og kristal nga tubig, nga dili kontaminado sa unsa mang butang nga naagian niini, lunsay gihapon ug tin-aw, paspas kini nga nagadagayday. Dayon mihinay kini sa pagdagayday. Dayon, halos pahunong na, ug nahunahuna niya kung makaabot pa kaha kadto sa pinakaubos sa bukid, ang maong lima ka agos. Ug dayon nakamata siya.

<sup>105</sup> Sa tan-aw ko halos mao gyud kana, dili ba, Igsoong babayeng Shepherd?

<sup>106</sup> Bueno, sa dihadiha nga gikuha ko ang sulat niya ug giablihan kini, sa wala ko pa kini basaha, nakita na nako ang iyang damgo.

107 Sa ingon nianang paagi ginahubad ang mga damgo. Karon, daghan sa inyo ang miduol kanako nga adunay mga damgo, ug—ug ginasulti sa ako ang mahitungod sa inyong mga damgo. Ginasulti ko, “Kadali lang. Wala mo gisulti ang tanan.” Kita n’yo? Ug balikan ko kini ug isulti kini pag-usab. Dayon kung dili n’yo masulti ang gidamgo n’yo, unsaon ninyo pagkahibalo kung ang interpretasyon ba’y husto o dili? Kita n’yo? Kinahanglan mo gayud, kinahanglan mong makita mismo ang gidamgo. Ang panan-awon ang nagapakita sa maong damgo. Ug sa dihing makita mo ang damgo nga gidamgo sa tawo, ug masulti mo sa ila sa dili pa nila masulti sa imo, kung ingon-ana kabalo ka na sa interpretasyon.

108 Bueno, nagatoo ako nga anaa kana sa Kasulatan, usab, kang Daniel, usa ka higayon. Dili ba husto kana? Miingon. . . Oo. Nagatoo ko nga kalit ko lang kini nahunahuna. Kita n’yo?

109 Pero kanunay mong makita ang damgo, karon, kung husto ang interpretasyon. Pag-adunay tawo nga magsulti kanimo sa iyang damgo, mapahunong mo gyud siya, moingon, “Kadali lang. Ug di ba *ingon niini-ug-ingon niana*. Mao gyud *ingon niini-ug-ingon niana*, dayon *ingon niini-ug-ingon niana* pa.”

Ug dayon ingnon ninyo, “Husto gyud kana.” Kita n’yo?

110 Adunay usa ka lalaki, sa miaging adlaw, nga naninguha gyud siyang isulti sa ako ang damgo nga gidamgo niya. Ingon niya, “Bueno,” ingon niya. . .

Miingon ko, “Bueno, igsoon, nganong wala mo man giapil ang usa pa ka bahin niadto?”

Ingon niya, “Unsa pa’y ubang bahin?”

111 Miingon ko, “Gidamgo mo nga nag-itsa ka og usa ka bato sa hangin, ug gipusil ko kadto ug napisikan ako sa mata.”

112 Ingon niya, “Mao gyud kana ang kamatuoran, Igsoong Branham.” Ug kagahapon lang nila nakuha, ang ulahing tagsip niini. Uh-huh.

113 Busa mao kana. Kita n’yo? Nakita n’yo? Ngano man? Dili n’yo man isulti ang tibuok kamatuoran niini, pero, nakita n’yo, kanunay gyud Niini ginapahayag balik, kung unsa, nga isulti mismo sa inyo ang inyong damgo, kung unsa’y damgo n’yo. Busa kabalo gyud mo nga husto kini.

114 Karon, ania ang interpretasyon sa iyang damgo. Nabalaka siya bahin sa Balaang Espiritu. Karon, ingon nga ang nakita niya nga kahon ibabaw sa bukid, bato. Batong kahon, ang *bato*, “pagsugid.” Karon, sama sa gisulti ni Jesus diha sa Kasulatan. Ingon Niya, ang ingon ni Pedro. . . “Kinsa,” ingon ni Jesus, “sumala sa sulti sa mga tawo kinsa man Ako, nga Anak sa tawo, kono?”

“Adunay usa nga nagsulti nga Ikaw si ‘Elias,’ ug ‘Moises,’ ug uban pa.”

Ug ang ingon Niya, “Apan kamo unsa ma’y sulti ninyo kung Kinsa Ako?”

Ingon ni Pedro, “Ikaw mao ang Cristo, ang Anak sa buhi nga Dios.”

<sup>115</sup> Karon, adunay ubang mga tawo ang nagasulti karon, ang sulti sa iglesiang Katoliko, ginasulti sa iglesiang Romano Katoliko, nga ang Iyang pag-... “Kung unsa kadtong bato, nga gisulti ni Jesus, ‘Sa ibabaw niining bato pagatukoron Ko ang Akong Iglesia, ug ang mga ganghaan sa hades dili gayud makabuntog Niini.’” Ang ingon nila, “Si Pedro Kini. Ug si Pedro kono mao kadtong bato, tungod kay ang buot kono ipasabot sa *Pedro* ‘gamay’ng bato.’ ‘Sa ibabaw niining gamay’ng bato pagatukoron Ko ang Akong Iglesia.’” Ug diha kang Pedro, sa ilang, apostolikong pagpuli-puli, gitukod kono nila ang iglesia.

<sup>116</sup> Dayon ang ingon sa iglesiang Protestante, “Sayup kana. Nga, Iyang gitukod ang Iglesia sa Iyang Kaugalingon.”

<sup>117</sup> Karon, dili sa di pag-uyon, pero, ako, ang paagi sa pagkakita ko niini, pareho silang sayup. Tungod kay, wala gayud niya Kini sukad gitukod sa ibabaw ni Pedro, ni dili pud Niya Kini gitukod sa Iyang Kaugalingon, pero gitukod kini ibabaw sa kapadayagan ni Pedro mahitungod sa kung Kinsa si Jesus. Kita n’yo?

“Sumala sa sulti tawo kinsa man kono, Ako nga Anak sa tawo?”

“Ikaw mao si Cristo, ang Anak sa buhi nga Dios.”

<sup>118</sup> “Bulahan ikaw, Simon, anak ni Jonas. Unod ug dugo wala kini gipadayag kanimo,” nga kung unsang seminaryo, kita n’yo, “kondili ang Akong Amahan nga anaa sa Langit mao ang nagpadayag kanimo. Ikaw si Pedro. Sa ibabaw niining bato sa pagpahayag, sa ibabaw niining kapadayagan, pagatukoron Ko ang Akong Iglesia.”

<sup>119</sup> Ug dugay na kining ingon niana, sa matag kapanahonan sa iglesia aduna gyud kanang bato sa pagpahayag, hangtud niining bato sa pagpahayag sa Laodicea.

<sup>120</sup> Ug, karon, dili kamo makahimo og usa ka balaan nga iglesia. Walay ingon nianang butang nga usa ka balaan nga iglesia o balaan nga organisasyon. Mahimong iwali dinha ang Balaang Espiritu, pero makakaplag pud mo dinha og mga maayo ug dautan, mga masupilon, mga walay pagtagad, ug uban pa. Busa dili makabarug ang usa ka organisasyon. Dili ninyo masulti, “Nadawat na namo Kini. Ang tanang uban pa kanila wala nakadawat Niini.” Wala, sir. Ang Balaang Espiritu ginabubo sa mga indibiduwal. Sa indibiduwal ra gyud.

<sup>121</sup> Mao, nga, ang bato, kining pang-ulahing-adlaw, nga pentecostal nga Iglesia nakadawat sa Balaang Espiritu, sama nga nadawat pud nila mga niadtong una. Sa tanang nangaging mga kapanahonan, ilang nadawat ang Balaang Espiritu, pero

dili sa sukod nga nadawat nila Kini karon, tungod kay kini usa ka pagpasig-uli sa nahauna. Sa pagsubay nato sa mga tangkawan, ang Alpha ug Omega, kung giunsa nila kaniadto pagdagkut sa unang kandila; nga kini’y midan-ag ug midan-ag pa, ug dayon hinayhinay nga nagakapalong; dayon balik na pud. Kita n’yo? Sa una ug sa katapusan, ug uban pa.

<sup>122</sup> Karon, pero sa niining kapanahonan sa iglesia, ginabubo ang Mensahe ngadto niining iglesia. Pero ang iglesiang lawas, mismo, sa kinatibuk-an niini sama sa . . .

<sup>123</sup> Kining tabernakulo, ingnon nato. (Dinha kon diin siya nagasimba.) Kini nga tabernakulo dili usa ka Espiritu Santo nga tabernakulo. Walay ingon niana nga butang. Ang mga indibiduwal nga nagatambong niining simbahan mao ang Espiritu Santo nga mga tabernakulo. Sila ang mga tabernakulo nga adunay Espiritu Santo, pero dili ang iglesia nga lawas, nga grupo. Busa, Kini nag-awas.

<sup>124</sup> Pero, kining, lalaki nga nagabubo og tubig, mao ang mensahero para sa iglesia, nga ginabubo ang Mensahe ngadto sa iglesia, pero unsa ma’y ginabuhat niadtong tubig? Ginaanod niini ang tanang basura nga anaa sa sulod niini. Mao kana ang ginabuhat sa Balaang Espiritu, gipang-anod na niini, karon.

<sup>125</sup> Karon, ang dugos nagrepresentar sa paghinigugmaay nga minagsoon, pagbati nga inigsoon, nga mao kining kapanahonan. Bag-o ko lang gisulti, kita n’yo, ang mahitungod sa pagbati nga inigsoon, kining kapanahonan nga gipuy-an nato karon.

<sup>126</sup> Karon, tingali moingon mo, “Tan-awa gani, ako—ako—dili gyud ko ganahan ni Igsoong Neville.” O, “Dili gyud ko ganahan ni Igsoong Jones. Dili ko ganahan ni Igsoong *Ingon niini-ug-ingon niana*,” ug mora’g ingon-ana. Pero pag adunay butang nga mahitabo kaniya, igsoon, mahugno gyud ang kasingkasing mo. Halos mamatay ka. Kita n’yo? Puede kitang makabaton og pagbati nga inigsoon ug pagbati para sa usa’g usa. Kita n’yo? Pero ang magpabilin sa usa ka grupo sa mga tawo . . .

<sup>127</sup> Nganong nagapakabana ka nianang igsoon? Tungod kay nakipagpikaspikas ka man og tinapay kauban niya dinhi sa altar, sama sa pagabuhaton ninyo unyang gabii. Nakipag-fellowship ka uban kaniya. Gilamano mo siya. Nagasimba ka uban kaniya. Igsoon mo siya. Ug tingali aduna siya’y gibuhat og unsa mang butang diha sa unod, nga dili ka uyon, mao nga medyo imo siyang, (nga dili mo unta angay buhaton), imo siyang ginalikayan. Pero sa kinasuloran sa imong kasingkasing, pag adunay butang nga mahitabo sa maong igsoon, halos ikamatay mo kini, o nianang igsoong babaye.

<sup>128</sup> Ako—ako’y tawong tigulang na. Kanhi bata pa ako, ug karon tigulang na ako. Nakita ko na kini, latas sa kapanahonan, nga nagakahitabo kana. Mga tawong madungog ko nga nagasulti, “Ayaw kong magkaaduna pa og kahilambigitan

nianang tawhana.” Ug adunay nahitabo nianang tawhana, halos ikamatay man diay niya kini. Hunahunaon niya, “Oh Dios, gipasagdan nako ang bililhon kong igsoon, nga mamatay nga wala man lang ko nakapasig-uli kaniya.” Nakita n’yo? Kita n’yo? Kita n’yo? Paghinigugmaay kini nga minagsoon. Morag dili kini motaput, pero motaput gyud diay. Ang dugos, motaput man gud.

<sup>129</sup> Karon, ingon nga milugsong siya gikan didto, palugsong gikan sa bungtod, ngadto sa tiilan sa bungtod, niadtong panahona, kadtong mahimayaong tubig midagayday kono gikan sa ibabaw sa mga bungtod, sa lima ka mga agos. Karon, ang lima mao’y numero sa grasya; J-e-s-u-s, p-a-g-t-o-o, g-r-a-s-y-a. Kita n’yo? Ang lima mao’y numero sa grasya. Lima ka agos ang nagadagayday paubos gikan sa sandayong, paubos *dinhi*.

<sup>130</sup> Ang matag usa niining mga kapanahonan aduna nianang bato nga pagpahayag. Nahikatulog lang ang mga balaan, nga nanaghulat, nanaghulat, nanaghulat, nanaghulat, kita n’yo, hangtud sa niining kapanahonan. Pero dili magdugay ang Espiritu Santo, nga gibubo gikan kang Cristo, moabot ug selyohan ang Iglesia. Dayon pagasakgawon na ang Iglesia. Mahimo na kining kumpletong yunit sa Dios, usa ka Pangasawonon para kang Cristo, nga mahimong Ulo sa tanan nga mga butang. Nasundan n’yo ba ako karon? [Nagaingon ang kongregasyon, “Amen.”—Ed.]

<sup>131</sup> Karon, nahibulong siya. Karon, sa iyang damgo, nahibulong siya, “Kini bang gamay’ng agos. . .Kini bang gamay’ng agos makaabot kaha kini hangtud sa ubos?” Kita n’yo? Nagakamala na man gud kadto. Karon, tungod ingon niana, siya mismo. Karon ania ang gusto kong padulngan ninyo karon. Siya mismo naghunahuna mahitungod sa iyang kaugalingon. Kung siya ba kaha “nakabaton na sa Espiritu Santo”?

<sup>132</sup> Karon, ginalikayan ko nga isulti kini, mga pipila ka adlaw ang milabay, nga gihunahuna ko kung igo na kaha ang pagka-espirituhanon sa iglesia aron masabtan kini. Ug tingali mas maayo nga undangon ko na lang ang pag-teyp niini karon mismo, tungod dili ko gusto nga modangat kini sa taliwala sa mga kaigsoonan. Pero makasulti mo og ubang mga pinulongan, makasinggit mo, makasayaw mo, makahingilin mo sa mga yawa, mabuhat ang bisan unsa nga gusto n’yo, ug wala gihapon mo og Espiritu Santo.

<sup>133</sup> Dili ba nga ang mga tinun-an kaniadto namalik, nga nanagkalipay ug nanagsinggit tungod kay ang mga yawa nagpasakup man ngadto kanila, ug si Jesus. . . nga kauban nila mismo si Judas?

<sup>134</sup> Dili ba miingon man si Jesus, “Nianang adlaw,” sa pag-abot Niya, nga, “daghan unya ang moduol Kanako ug moingon, ‘Ginoo, dili ba nanagpagula man ako og mga yawa, ug sa Imong Ngalan nagbuhat ako og gamhanang mga buhat?’ Ug moingon

Ako, ‘Pahawa kamo Kanako, kamong mga mamumuhat og dautan. Wala Ko kamo igkaila.’” Mao nga kanang mga butanga dili mga indikasyon sa Balaang Espiritu.

“Pinaagi sa ilang bunga maila ninyo sila.”

<sup>135</sup> Karon moingon mo, “Igsoong Branham, kami ba, kinahanglan ba kaming magsulti sa ubang mga pinulongan?” Sa walay duda. Mga gasa kana sa Dios. Pero bisan pa nianang mga gasa sa Dios, kung wala ang maligdong nga pamatasan diha kanila, mahimong kapangdolan ngadto sa mga di-magtotoo. Dili kana dawaton sa Dios.

<sup>136</sup> *Kini* ang gikinahanglan una. Ug sa dihang aduna ka’y pagtoo, kaligdong, kahibalo, pagpugong sa kaugalingon, pagpailub, pagkadiosnon, ug paghinigugmaay nga minagsoon, dayon mokunsad ang Espiritu Santo ug pagaselyohan kamo ingon nga usa ka yunit, sama sa mao gihapong paagi nga Iyang ginaselyohan ang mga kapanahonan sa iglesia ingon nga usa ka yunit. Kung ginaunsa Niya pag-umol sa Iyang Pangasaw-onon mao usab ang Iyang pag-umol sa Iyang indibiduwal; nga hinimo gikan sa mao rang materyales, sama kang Eva nga hinimo gikan kang Adan, nga gikan sa kilid nga gusok. *Ania* ang mga butang nga gikinahanglan ninyong unahon una. Dili ninyo mahimong awat-awaton ang mga niini. Dili ninyo masundog-sundog ang mga niini. Gikinahanglan nga pinadala-gyud-sa-Dios ug natawo-gyud-sa-Dios. Ang pagsundog-sundog maghinungdan lang og kalibog.

<sup>137</sup> Sama kini sa gisulti ko na. Mahunahuna ba ninyo ang usa ka buitre nga nagatugdon didto nga adunay gisuksok nga balahibo sa salampati diha sa iyang mga pako, moingon, “Tan-awa ninyo, usa ako ka salampati!” Dili siya usa ka salampati. Usa siya ka buitre, azor. Mahunahuna ba ninyo ang usa ka itum nga langgam nga adunay gisuksok nga balahibo sa peacock diha sa iyang mga pako, ug nagaingon, “Kita n’yo!”? Butang lang kana nga gisuksok niya dinha.

<sup>138</sup> Pero kinahanglan nga nagagikan kini sa kinasuloran pagawas, ug nagapamunga og pagka-Cristohanon; ang Dios, pinaagi sa gahum sa Balaang Espiritu!

<sup>139</sup> Ang tiil sa atong igsoong babaye nabasa sa pag-abot niya didto sa ubos. Tanan kita kabalo nga manggihatagon gyud si Igsoong babayeng Shepherd. Abli ang iyang balay. Siya ug ang igsoong lalaki, dili igsapayan kung kini ba’y nagalatagaw, makililimos, bisan unsa pa kini, pakaonon gyud nila kini, buhaton ang tanan nga mahimo nila aron matabangan kini. Oh! Gidawat kana sa Dios, ang pundasyon niya nga bahin.

<sup>140</sup> Ug ania, karon, sabta ninyo kini nga leksyon. Ania ang sayup sa—sa . . . Kapungtan gyud ako tungod niini. Ania ang sayup sa Branham Tabernacle. Kita n’yo, adunay duha ka nagkalainlaing matang sa pagtoo. Adunay duha ka nagkalainlaing matang sa



kaligdong, sama sa nahisgotan ko niadtong miaging adlaw. Duha ka nagkalainlaing matang sa kahibalo. Duha ka nagkalainlaing matang sa pagpugong sa kaugalingon.

<sup>141</sup> Ang hunahuna sa usa nga tungod kini sa pagdili, mao nga naangkon nila. Dili ingon-ana nga matang sa pagpugong sa kaugalingon ang ginahisgotan sa Dios. Nagapahinungod kini sa dili-diosnon, dili-mapugngan nga kainit-sa-ulo nga aduna ka, ug mga ingon nianang butang, mobalos dayon, makiglalis dayon.

<sup>142</sup> Pagpailub, ug uban pa, adunay pagyagayaga nga matang niini, usa ka pagpakaaron-ingnon; usa ka kinaiya-na-daan nga pagtoo; usa ka kinaiya-na-daan nga kaligdong. Adunay usa ka kinaiya-na-daan nga pagpugong sa kaugalingon. Kining tanan mga kinaiya na daan nga matang.

<sup>143</sup> Ug ang pinakadakung bahin sa atong pagtoo mao'y pagtoo sa utok lang. Pinaagi sa pagpatalinghug sa Pulong, ginadala kita niini sa usa ka pangutok nga pag-ila sa Dios.

<sup>144</sup> Pero kung Kini, nga naggikan sa Itaas, oh, igsoon, pag Kini nagaabot *niini*, adunay usa ka dionnon nga espirituhanong pagtoo. Dayon unsay buhaton sa nianang pagtoo? Ang bugtong ginaila nianang pagtoo mao ang Pulong. Bisan unsa pa'y ginasulti ni kinsa man, ginaila lamang niini ang Pulong, tungod kay, "Sa sinugdan mao na ang Pulong, ug ang Pulong kauban sa Dios, ug ang Pulong mao ang Dios." Ug ang Pulong nagapabiling Dios. "Ug ang Pulong nahimong unod ug nagpuyo ipon kanato." Ug sa diha nga ang Pulong Mismo ginabubo ngadto sa atong pagtoo, ang atong pangutok nga pagtoo mahimong usa ka espirituhanon nga kapadayagan.

<sup>145</sup> "Ug ibabaw niini nga pundasyon pagatukoron Ko ang Akong Iglesia." Kita n'yo? Dili ibabaw sa usa ka pangutok nga panghunahuna nga pagpamiyembro sa iglesia, nga usa ka pangutok nga panghunahuna bahin Niana; kondili basi sa kapadayagan, sa dihang ang mga sapa sa grasya gibubo na ngadto nianang pangutok nga pagtoo nga aduna kamo. Dayon, sa ibabaw niini, mao'y usa ka espirituhanon nga kapadayagan, "Pagatukoron Ko ang Akong Iglesia, ug ang mga ganghaan sa hades dili makabuntog Niini." Kita n'yo? Ginapakita niana nga sila'y mamahimong batok Niini, pero dili gyud kini modaug. Oh, pagkamahimayaong butang! Karon tan-awa ninyo ang pagtoo. Kining lima ka agos. . .

Aduna ko unta'y usa ka chalk dinhi, pero sa tan-aw ko wala niya kini napagawas.

<sup>146</sup> Pero ang lima ka agos nga nakita n'yo nga nagaagas paubos dinhi, ginahiusa *kini* tanan. Ang Balaang Espiritu mao ang nag-umol sa iglesia sa Efeso. Ang Balaang Espiritu ang nagpahimugso sa iglesia sa Esmirna. Ang Balaang Espiritu ang naghatag sa iglesia sa Pergamo, ug sa iglesia sa Tiatira, niadtong Mangiub nga mga Kapanahonan. Ang Balaang Espiritu mao

ang naghulma nianang Pangasaw-onon, ang mga Pinili nga gibira pagawas gikan sa tanan nga mga sistemang organisasyon sa tanang mga kapanahonan, nga sama niana. Adunay usa ka Pinili, predestinadong Pangasaw-onon ni Jesus Cristo, mga Pinili nga gitawag pagawas sa Balaang Espiritu. Ug ang Espiritu Santo kini sa una pa sa *niining* kapanahonan, sa *nianang* kapanahonan, sa *niana* nga kapanahonan, *niana, niana, niana, niana*, hangtud ngadto sa itaas, ang Balaang Espiritu.

<sup>147</sup> Ug karon sa mga indibiduwal, kining maligdong nga mga pamatasan ug ingon-anang mga butang, kahibalo ug pagpugong sa kaugalingon, igapuno sa atong pagtoo. Dayon sa dihang moabot na ang Batong-pangtaklub, pagasementohan Kini sa Balaang Espiritu aron mahiusa. Kana ang bautismo sa Balaang Espiritu. Mao kana kung nganong gamay ra kaayo kini sa panahon karon.

<sup>148</sup> Ako lang tan-awon dinhi, aduna ko'y pipila pa ka mga teksto nga gisulat dinhi. Tan-awon nato. Aduna ko'y hulagway nga nadrowing diri, para sa iyang damgo. Kita n'yo? Dili n'yo lang kini makita gikan dinha.

<sup>149</sup> Karon, pag-abot sa Espiritu Santo, unsa'y sunod? Iyang ihatag sa inyo, ang supernatural nga pagtoo, espirituhanong pagtoo, *dinhi* sa sulod. Dayon kanang espirituhanong pagtoo pagailhon lamang ang Pulong. Bisan unsa pa'y ginasulti ni kinsa man, walay—wala na kini'y epekto. Ang Pulong lang ang ginaila niini. Kung adunay moingon, “Ang mga adlaw sa mga milagro milabay na.” Ang Pulong lang ang pagailhon nianang pagtoo. Adunay moingon, “Wala na'y ingon niana sama sa bautismo sa Espiritu Santo.” Ang bugtong ginaila nianang pagtoo mao ang Pulong. Kana ang tinuod, espirituhanong pagtoo, nakita n'yo. Husto kana. Kita n'yo? Ang Pulong ra ang ginaila niini.

<sup>150</sup> Dayon, kana ang numero uno. Una, moabot sa inyo, ang inyong pagtoo nga dinhi sa utok lang, dayon nagaabot ang Balaang Espiritu nga nagakunsad diha sa inyong pangutok nga pagtoo, nga ginahimo kini nga espirituhanong pagtoo. Dayon pagailhon lamang sa maong espirituhanong pagtoo ang Pulong.

<sup>151</sup> Karon, ug ang ikaduha, ikatulo. Dayon maangkon ninyo ang espirituhanon, maangkon ninyo ang Balaang Espiritu, ug igaselyo *kining* tanan nga mga butang sa inyo, samtang ginatakluban *kini* sa Balaang Espiritu. Gikan sa inyong pagtoo, hangtud sa Balaang Espiritu, pagaselyohan kamo kang Cristo. Dayon kamo mamahimong Usa ra. Amen. (Kuhaa gani kini gikan sa akong atubangan; makapahawoy man gud sa mga bukton.) Kamo mamahimong Usa ra. Kita n'yo, ikaw ug si Cristo magkinabuhi na nga magkauban. “Niadto unyang adlawa kamo makaila nga Ako anaa sa Amahan, ang Amahan ania Kanako; Ako anaa kaninyo, ug kamo ania Kanako.” Kita n'yo? Busa usa kana ka giselyohan na nga yunit sa Ginoong Dios.

<sup>152</sup> Karon, ug dayon sila'y gipanghimatud-an ug gipuwesto. Pagmoabot kana nga kahigayonan, sila'y mamahimong mga gipanghimatud-an nga mga anak nga lalaki ug mga anak nga babaye sa Dios.

<sup>153</sup> Nahinumduman ba ninyo, dinha sa Basahon ni Mateo, sa ika-17 nga kapitulo, sa ika-1 ngadto sa ika-5 nga bersekulo, Si Jesus nga atua sa Bukid sa Pagkabalhin?

<sup>154</sup> Napatalinghugan n'yo na ang *Patalinghugi Ninyo Siya*. Kadtong wali nga akong, giwali, dinhi mga usa ka tuig na ang milabay, nga nahimong popular kaayo, *Patalinghugi Ninyo Siya*. Ang pagpahimutang sa usa ka anak sa puwesto, diha usab sa Mga Taga-Efeso 1:5, "Kita'y gipili-nang-daan sa Dios ngadto sa pagkasinagop ingon nga mga anak."

<sup>155</sup> Kita n'yo, sa usa ka pamilya, sa dihang ang usa ka anak nga lalaki gikahimugso sulod niini, usa na kini ka anak nga lalaki kung ingon-ana. Pero kana nga anak adunay mga tigtudlo sa pagpadaku niini. Ug kung kana nga anak dili makaabot sa—sa pagkahimong angayan nga matang sa usa ka anak, dili gayud siya mamahimong manununod. Pero kung siya'y angayan nga anak, ug anak nga nagatuman sa iyang amahan, nan ginasagop siya, o ginabutang sa angay'ng posisyon niini. Siya'y mahimong manununod sa kung unsay aduna ang iyang amahan.

<sup>156</sup> Ug mao kana ang gibuhat sa Dios didto sa Bukid sa Pagkabalhin. Sa dihang gikuha Niya ang Kaugalingon Niyang Anak, human nga mapamatud-an nga Siya'y takus nga Anak, kita n'yo, ug nasagubang Niya ang tanang mga tentasyon, Iyang gidala Siya didto sa Bukid sa Pagkabalhin ug gilandongan Siya.

<sup>157</sup> Kabalo mo, sa Daang Tugon, ginakuha nila ang usa ka anak nga lalaki, bistihan siya og usa ka matahum, matahum nga bisti, ug ipasundayag siya sa atubangan sa publiko. Ug magpahigayon sila og usa ka seremonya sa pagpalingkod sa puwesto, o gitawag nato kini nga pagsagop. Diha sa Mga Taga-Galacia, mora'g sa tan-aw ko giisip kini ni Pablo nga pagsagop og mga anak nga lalaki. Karon, pero, ang pagbutang sa posisyon sa usa ka anak, makasabot niini ang mga ministro, ug ang mga espirituhanong, mga magbabasa sa Biblia, pagbutang kini sa anak nga lalaki diha sa posisyon. Sa ubang pagkasulti, ang anak usa na daan ka anak sa dihang natawo siya.

<sup>158</sup> Dinha nasayup ang mga igsoon natong Pentecostal. Ang maipanganak sulod sa pamilya, pinaagi sa Espiritu Santo, husto kana, pero bisan pa niana kinahanglan nga mamahimo kitang takus nga matang sa mga anak, nga gitudloan sa hustong Magtutudlo. Kita n'yo?

<sup>159</sup> Karon, kung ang usa ka lalaki, niadtong karaang panahon, kung ang tinguha niya para sa iyang anak, mao'y gusto niya nga siya'y mahimong takus nga matang sa anak, magkuha siya og pinakamaayo nga magtutudlo nga makit-an niya, ang

pinakamaayo nga magtutudlo mismo, tungod kay gusto niya nga ang iyang anak modaku nga sama sa papa niini. Kita n'yo? Busa magkuha gyud siya og hustong magtutudlo.

<sup>160</sup> Karon, kung ang usa ka tawo dinhi sa yuta maghunahuna nga magkuha og pinakamaayo nga magtutudlo, unsa pa kaha ang Dios, nga atong Amahan? Karon, wala Siya sukad magkuha og mga obispo, ug mga kardinal, ug mga pari. Ang gikuha Niya mao ang Espiritu Santo nga mahimong atong Tigtudlo. Ug ang Balaang Espiritu mao ang atong Magtutudlo. Ug Siya—Siya anaa sa Iglesia, ug Siya'y nagasumbong ngadto sa Amahan.

<sup>161</sup> Ug dayon unsa kaha kung ang amahan, o, ang magtutudlo moabot ug moingon, “Bueno, Amahan. . .” Karon, dili gyud siya magkuha og kung unsang matang sa tigtudlo nga gusto lang mao'y dagami sa iyang kalo, kabalo na mo, usa ka balhibo, sama sa tawag nato niini. Ingon, “Oh, kung isulti nako sa amahan ang butang mahitungod sa. . .Nga tampalasan ang maong batang lalaki, bisan unsaon, pero kung akong—kung akong itug-an sa amahan, tingali taasan niya ang akong suweldo.” Pero dili kana ang husto nga matang sa magtutudlo kung ingon-ana. Ang husto nga matang sa magtutudlo mao'y matinuuron, isulti gyud ang tinuod.

<sup>162</sup> Ug ginasulti sa Espiritu Santo ang Kamatuoran sa dihang Siya'y nagaduol atubangan sa Dios, mahitungod sa ato. Oo. Busa sa pag-atubang Niya didto. Unsa man sa hunahuna n'yo? Mamula gyud Siya sa pagsulti, “Ang mga anak Mong babaye nanagpapatul sa ilang buhok, ug bisan gisulti Mo na sa ila nga ayaw gyud kini buhata. Ang mga anak Mong lalaki makaorganisasyon kaayo ang panghunahuna, ayaw nila ang usa'g usa. Tinuod kana. Ug mas ginadawat nila ang *ingon niini* imbes nga Kini, ug *kini* imbes nga Kana.” Siguradong mamula gyud Siya! Pero gusto gyud nianang Magtutudlo nga moduol ug moingon, “Oh, grabe! Kanang Imong anak usa gyud ka tinuod nga anak. Pareho gyud siya sa Iyang Amahan.” Oh, gustong-gusto Niya nga isulti kana! Kita n'yo?

Dayon ang Amahan mapasigarbohon nga, moingon, “Kini ang Akong anak!”

<sup>163</sup> Eksaktong ingon niana ang gibuhat sa Dios didto sa Bukid sa Pagkabalhin. Matikdi, nagpakita didto si Moises ug si Elias. Ug si Pedro, sa sobrang kalipay; nga adunay nahitabo nga supernatural. Sa sobrang kalipay ni Pedro, miingon, “Magbuhat kita og tulo ka mga tabernakulo, usa para sa Imo, ug usa para kang Moises, ug ang usa para kang Elias.”

<sup>164</sup> Samtang nagasulti pa lang siya, gipahilum siya sa Dios. Ingon Niya, “Kini mao ang Akong Anak nga hinigugma nga Kaniya Ako adunay kalipay. Patalinghugi ninyo Siya.” Kita n'yo? Mipuwesto ang Dios sa luyo, ug, “Kini ang Akong Anak.”

165 Girepresentar ni Moises ang balaod. Girepresentar sa mga propeta ang Iyang hustisya. Dili nato mahimong mabuhi pinaagi sa Iyang balaod. Dili nato mahimong mabuhi pinaagi sa Iyang hustisya. Wala nako gipangayo ang hustisya. Kalooy ang gusto nako, dili hustisya. Dili gyud nako matuman ang Iyang balaod, ug dili nako mahimong atubangon ang Iyang hustisya. Pero ang gikinahanglan nako ang Iyang kalooy. Ug ang ingon sa Dios nga ang balaod ug hustisya nangatuman na diha Kaniya. “Siya ang Akong Anak nga hinigugma. Patalinghugi ninyo Siya. Siya kini. Siya Kana.”

166 Karon, sa Daang Tugon sa dihang gisagop ang maong anak, o gibutang na sa posisyon sulod sa pamilya, ang iyang pirma sa tseke ingon na ka balido sama sa kung unsa ka balido ang pirma sa iyang papa. Oo, sir. Wala sila’y. . . Aduna sila kaniadto og singsing, niadtong mga adlaw, nga usa—usa ka ilhanan, pangselyo. Ug sila’y. . . [Naga-ilustrar si Igsoong Branham og tunog sa pagluwa ug gidukdok ang pulpito—Ed.] Pagaluwaan kini, ipasul-ob kini, kadtong singsing nga pangselyo. Kadto ingon nga. . . Gisul-ob na niya ang singsing sa iyang papa, ang iyang pangselyo. Ug ingon ka balido kadto sama sa iyang papa.

167 Karon, sa dihang si Jesus nagmasinugtanon, si Jesus ngadto sa Dios, gibutang Siya sa Dios sa Iyang posisyon, “Kini mao Siya.”

168 Karon, sa dihang ang usa ka miyembro natawo pinaagi sa Espiritu Santo ngadto sa pamilya sa Dios ug napamatud-an nga aduna siya niining maligdong nga mga pamatasan diha kaniya, nga makita sa Dios ang kaligdong, kahibalo, pagpugong sa kaugalingon, pagpailub, pagbati nga inigsoon, ug pagkadiosnon, diha kaniya, dayon pagaselyohan siya sa Dios, o ibutang na siya sa pagkaposisyon. Ug, dinha, sa ingon niana ninyo makita ang mga anak nga lalaki ug mga anak nga babaye sa Dios.

169 Dayon, ginaingon sa Mga Taga-Efeso 4:30, “Ayaw ninyo pagpasub-a ang Balaang Espiritu sa Dios, nga diha kaniya giselyohan kamo hangtud sa Adlaw sa inyong pagtubos.” Karon, ang pipila sa inyo nga mga Baptist nga gustong makaabot sa Eternal nga kasiguradohan, karon, kung moabot kamo nianang yugtoa, mobarug ako kauban ninyo sa nianang Eternal nga kasiguradohan, pagmoabot na kamo nianang puntoha.

170 Pero kanang basta lang isulti, si bisan kinsa lang mosulti, “Nagpamiyembro ako sa iglesiang Baptist. Usa ako ka Presbyterian. Aduna na ko’y Eternal nga kasiguradohan.” Sayup kana. Nagapamatuod ang inyo mismong kinabuhi nga wala pa ninyo naangkon Kini, hangtud nga maanaa na Kini dinha.

171 Ug sa gisagop kamo sa Dios ug giselyohan na kamo pinaagi sa Espiritu Santo pasulod sa Iyang Gingharian, dayon wala na gayu’y higayon nga makagawas pa gikan niini. Eternal na kamo

nga luwas. Nagatoo. “Ayaw ninyo pagpasub-a ang Balaang Espiritu sa Dios nga diha kaniya kamong tanan ug ang inyong diosnon nga mga gawi giselyohan na hangtud sa Adlaw sa pagtubos.”

<sup>172</sup> Nagatoo ako nga adunay Pangasaw-onon nga gipili-nangdaan. Nagatoo ako nga gisulti sa Dios nga magkaaduna Siya og “usa ka Iglesia nga walay buling o kunot.” Nagatoo ako sa predestinasyon, nga ang Pangasaw-onon gikatagana-nangdaan. Siguradong maatua gyud Siya Didto. Nagalaum ako nga lakip ko Kaniya. Nga, kita n’yo, ako’y kalakip Niya. Karon nakadepende na sa ako nga panlimbasugan ang akong kaugalingong kaluwasan sa Dios, hangtud nga *kining* mga butanga gipamatud-an sa Dios, ug dayon giselyohan ngadto sa Ginghamarian sa Dios. Mao kana ang Balaang Espiritu. Mao kana ang tinuod nga mga buhat sa Dios. “Kini giselyohan na hangtud sa Adlaw sa pagtubos.”

Mao kana ang iyang damgo. Sa hunahuna ko maanindot kini.

<sup>173</sup> Karon, busa, kung buhaton Niya kana, pagmoabot kana nga Iglesia nianang puntoha, o ang indibiduwal, ang Iglesia makaabot gyud Didto. Tugoti ninyong isulti nako kini sa klaro para makuha gyud ninyo kini. Predestinado gyud ang Iglesia nga mamaatua Didto. Gusto kong mahiuban Niini, pero ang bugtong paagi aron ako makauban Niini, mao ang mamahimong kabahin Niini. Unsaon nako pagkahimong kabahin Niini? Pinaagi sa pagsulod Niini. Unsaon nako pagsulod Niini? Pinaagi sa usa ka bautismo, pinaagi sa usa ka Espiritu. Unang Mga Taga-Corinto 12, “Pinaagi sa usa ka Espiritu kitang tanan gibautismohan ngadto sa usa ka Lawas.” Usa ka Lawas; gibautismohan ngadto Niini.

<sup>174</sup> Pero dili ninyo maipilit kining gagmay’ng mga butang, nga moingon, “Nakasulti ako og ubang mga pinulongan. Ako nang naangkon Kini.” Dayon mogawas ka gihapon dinhi, ug suko, ug nagapamalikas, ug kung unsa na lang ang ginabuhat. Kita n’yo? Kana’y pagbutang og mga balhibo sa peacock diha sa usa—usa ka langgam nga jay. Kita n’yo? Dili ninyo mahimo. Ang inyo mismong kinabuhi nagapamatuod nga dili gyud.

<sup>175</sup> Pero kung kining mga butanga nagapamuhat sa inyo, pinaagi sa Dios, nan kamo naselyohan na. Kung ingon-ana wala na’y pagpakaaron-ingnon bahin niini. Ikaw mismo kini. Mao kana’y kahigayonan nga ang mga panan-awon, hingpit, nga Balaang Espiritu, mga buhat sa Dios, ang tanan, maipadayag, tungod kay (ngano man?) ikaw ug si Cristo nahimong usa na. Nanghinaut ko nga nasabtan kana. Ikaw ug si Cristo nahimong usa na.

<sup>176</sup> Aduna ko’y uban pa nga nasulat dinhi, nga gusto nakong pamalandongan. Ginadala kita niini ngadto sa lugar sa Kinabuhi. Dayon ikaw nahimong. . . adunay Kinabuhing Walay Katapusan.

177 Karon, may Griyegong lexicon ako dinhi, *The Emphatic Diaglott*. Nagtuon ako niadtong miaging adlaw mahitungod sa usa ka pulong.

178 Karon, diha sa Juan 14, o Juan 3:16, makaplagan nato, ang usa ka dapit nga nagaingon, “adunay Kinabuhing *hangtud sa kahangturan*.” Sa usa pud ka dapit nagaingon, “adunay Kinabuhing *Walay Katapusan*.” Pero sa Griyego, sa Griyegong bersyon. . . Sa Hebreohanon, ang ingon dinhi, “Kinabuhi nga wala na’y katapusan.” Sa Griyegong pulong, adunay a-i-n-i-o-a-n.

179 Halos mora’g “*aeon*.” Ang *Aeon* mao’y “usa ka gidugayon” nga dili mahimo, usa ka numero nga dili maihap. Kini’y lagpas pa sa milyon-milyon, trilyon-trilyon, bilyon.

180 Pero kini mao ang *aionios* sa panahon, Kinabuhing Walay Katapusan. Ug ang Ingles nga pulong para niini mao’y Walay Katapusan. Nahibalo kita niini ingon nga Walay Katapusan, *aionios*, o “Kinabuhi nga wala na’y katapusan.” Kita n’yo? Ug kung aduna kamo’y Kinabuhi nga wala na’y katapusan, unsaon man ninyo sa pagkahanaw? Nahimo kamong kabahin sa Eternal. Ug adunay usa lamang ka butang nga Eternal.

181 Si Satanas dili Eternal. Dili. Siya—nahimo siyang Satanas. Ang impiyerno dili Eternal. Gibuhat lang ang impiyerno. Dili kini Eternal. Ug kini nga mga lawas dili Eternal. Gilalang lang ang mga niini.

182 Pero ang Espiritu sa Dios mao’y Eternal. Wala kini og sinugdanan, o wala pud Kini og katapusan. Ug ang bugtong paagi nga magkaaduna kita og Kinabuhing Walay Katapusan, gikan sa nianang Griyegong pulong, nga *Zoe*, nga ang buot ipasabot, “Kinabuhi mismo sa Dios,” naangkon nato, nahimong kabahin kita sa Dios sa dihang nahimo kitang mga anak nga lalaki ug mga anak nga babaye sa Dios, ug naangkon nato ang *aionios* nga Kinabuhi. Busa ang bahin nga nagakinabuhi, sa ato, nga ginaila kining Pulong, gikan *dinhi* ngadto *didto*, nga nagaila, mao’y Kinabuhing *aionios*, “Kinabuhi nga wala na’y katapusan.” Kini ang Kinabuhi Mismo sa Dios nga ania kanato. Amen. Whew!

183 Sa miaging adlaw, sa akong pagbiyahe, nakapakigdiskusyon ako, sa Jehovah Witness. Karon, dili man sa ginapakaubos ko ang pagtulon-an sa uban. Daghan kita nga mga kinabig nga nagalingkod dinhi, gikan sa Jehovah Witness. Usa sa atong mga sinaligan sa iglesia Jehovah Witness man, *kaniadto*, ug siya’y naluwas, siya ug ang iyang pamilya. Ang papa niya usa ka magbabasa; si Igsoong Wood ug sila. Ang tanan niyang mga igsoong lalaki ug mga igsoong babaye karon, halos tanan sila’y nakasulod na, gidawat ang Espiritu Santo, tungod sa mga panan-awon nga gikan sa Dios nga ginasulti kanila kung unsay

mga gibuhat nila. Ug ang butang nga ilang. . . Kita n'yo? Kana ang nagpabuhat niana.

<sup>184</sup> Karon, pero dinhi, ang Jehovah Witness sa ilang libro, ginasulti nila nga ang gininhawa nga inyong giginhawa mao ang kalag. Karon, dili kana husto. Ang gininhawa nga giginhawa ninyo dili ang kalag. Kung ingon niana man, kamo—kamo sa usa ka higayon mao'y usa ka matang sa kalag, dayon sa sunod higayon mao'y uban na pud, nga giginhawa ninyo kana nga kalag. Tan-awa ninyo kung asa mo sa ingon niana. Karon, ang gininhawa mao'y hangin, ug ang hangin ang giginhawa ninyo sa mga buho sa inyong ilong.

<sup>185</sup> Karon, gibasi nila kini sa Kasulatan, “Ug gihuypan sa Dios og Gininhawa ang iyang ilong, ug nahimo siyang buhi nga kalag.” Karon, gusto kong mangutana sa inyo og usa ka butang. Kung usa siya ka tawo, unsa diay nga matang sa gininhawa ang giginhawa niya sa wala pa siya gihuypan sa Dios og Gininhawa sa Kinabuhi? Kita n'yo? Unsang matang sa gininhawa? Nagginhawa siya kaniadto, ingon nga buhi nga tawo. Mao, nga, kung ingon niana man, nan ang matag mananap usa diay ka buhi nga kalag, tungod kay nagginhawa man sila og kalag sa tawo, ug ang atong kalag, ug tanan pareho ra. Kung ingon-ana dili diay kinahanglan nga mamatay si Jesus. Ang halad nga mananap mahimong igo na unta. Kita n'yo? Busa, igsoon, ang maong argumento dili gyud mobarug.

<sup>186</sup> Pero ang butang nga gibuhat sa Dios, giginhawa Niya ang Gininhawa sa Kinabuhing Walay Katapusan, amen, dayon ang tawo nahimong usa ka buhi nga kalag, usa ka kalag nga dili mamatay. Karon tan-awa ninyo karon. Mokuha kita og dugos, nga kutob mismo sa inyong siko. Matikdi. “Giginhawa ang Gininhawa sa Kinabuhing Walay Katapusan ngadto sa iyang mga buho sa ilong, ug nahimo siyang usa ka Walay Katapusan nga kalag.” Tungod kay, ang Dios ang nagginhawa, dili butang nga gibuhat sa kinaiyahan, kondili butang nga gibuhat sa Dios, gihuypan og Gininhawa sa Kinabuhi ang buho sa iyang mga ilong, ug nahimo siyang buhi nga kalag.

Dayon isulti ninyo sa ako, “Namatay man si Adan, Igsoong Branham.”

<sup>187</sup> Pero hinumduman ninyo, sa wala pa namatay si Adan, aduna siya'y karnero nga mitubos kaniya. Alleluyah! “Kadtong mga giila-nang-daan sa Dios, gitawag sa Dios.” Mikuha ang Dios og karnero para sa pagtubos kanila. Usa ka tipo si Adan. Nahulog siya. Dayon ang karnero gitagana para kang Adan, tungod kay sa mga buho sa iyang ilong nadawat na niya ang Gininhawa nga iya sa Walay Katapusang Dios, ug siya'y nahimong usa ka buhing kalag. Siya'y usa ka anak sa Dios.

<sup>188</sup> Dili ang iyang gininhawa, ingon sa Africanhong pulong. Wala ko kabalo kung unsa ang Griyegong pulong niini,



karon. Pero ang Africanhong pulong, ginatawag nila nga *amoyah*, nga ang kahulogan, “ang hangin; ang dili makita nga puwersa.” Nagaginhawa og amoyah ang mga mananap. Ang mga makasasala nagaginhawa og amoyah.

<sup>189</sup> Kung ingon-ana nganong makigbisog pa man kita para sa Kinabuhing Walay Katapusan, kung Walay Katapusang kalag kadto ang ginhawa nganhi kanato pinaagi sa gininhawa? Nganong makigbisog pa man kita para sa Kinabuhing Walay Katapusan? Nagasumbalik kini, igsoon. Kita n’yo? Kini—kini—dili gyud kini mahimo.

<sup>190</sup> Pero, ang Dios, ilabina gyud kang Adan, gihuypan og Gininhawa sa Kinabuhing Walay Katapusan, ug nahimo siyang Walay Katapusan nga persona sa Dios. Aduna siya’y gahum nga sama sa Dios. Siya’y usa ka gamay nga dios. Siya’y usa ka dios sa yuta; dili ang Dios sa Langit, ha. Dios sa yuta!

<sup>191</sup> Ug sa umaabot nga mga adlaw ang mga anak sa Dios mamahimong mga dios pag-usab. Gisulti kana mismo ni Jesus. “Dili ba nahisulat man kini sa inyong kasugoan, ‘Mga dios kamo’? Dayon kung mahimo ninyong tawgon kadtong Iyang mga gitawag nga dios, nga giduaw sa Dios, unsaon man ninyo pagkondena Kanako, sa pagsulti, pag-isulti Ko kaninyo nga Ako ang Anak sa Dios?” Kita n’yo? Karon padulong na kita sa lawum nga butang. Karon matikdi ninyo sa pagpalutaw nato niining puntoha.

<sup>192</sup> Karon, ania kini. Siya kaniadto usa ka anak sa Dios, pero nakahimo siya’g sayup. Kabalo siya nga ang ginahimo niya’y sayup. Karon hinumdumi ninyo, wala nalimbongan si Adan. Mao kana’y gisulti sa Biblia. Unang Timoteo 3. “Dili baya si Adan ang nalimbongan, kondili ang babaye mao ang nalimbongan, nahimong malinapason.” Pero giubanan ni Adan si Eva, tungod kay iya man kadtong asawa.

<sup>193</sup> Sama kang Cristo, nga wala nalimbongan ni Satanas, pero naglakaw padulong sa kamatayon kauban ang Pangasaw-onon. Giubanan Niya ang Pangasaw-onon, para Iyang maluwas ang Iglesia.

<sup>194</sup> Nahibalo si Adan nga sayup siya, busa migawas siya kauban si Eva. Kita n’yo? Pero adunay kordero nga gitagana para kanila, para tuboson sila.

<sup>195</sup> Ug kining mga carnero, karon, nga mga ghibalo nang daan sa Dios, ug mga gitawag sa Dios, aduna sila’y usa ka Manunubos. “Walay tawong makahimo sa pag-ari Kanako gawas lamang kon siya pagadanihon sa Akong Amahan. Ug ang tanan nga gikahatag Kanako sa Amahan magaari Kanako.” Husto ba? Busa adunay gitagana nga Cordero, sukad pa sa pagkatukod sa kalibutan, kon diin ang ilang mga ngalan gibutang sa Libro sa Kinabuhi sa Cordero. Usa ka Cordero ang gitagana, para hatagan og dalan ang grasya para sa matag usa kanila nga

mahiuban sa pagkabanhaw, usa ka gitagana nga Cordero; Ang cordero ni Adan, karon matikdi, ingon nga si Adan adunay gitagana nga cordero.

<sup>196</sup> Karon, mao kana ang Iglesia sa panahon karon. Wala nako gipasabot ang—ang iglesia. Kabalo ba mo kung unsa?

<sup>197</sup> Wala nako kini ginasulti ingon nga pagpasipala, ug wala nako kini gituyo nga makapasakit sa pagbati sa uban. Wala ako moanhi aron buhaton kana, ingon nga nasaysay ko na ang akong kaugalingon. Ania ako aron sa pagtabang, pero ang gipaningkamotan kong buhaton . . .

<sup>198</sup> Kabalo ba mo kung unsa? Sa pagkatinuod, kini nga mga iglesia dili man gud mga iglesia. Adunay usa lamang ka Iglesia. Kini mga kapunongan lang. Kita n'yo? Mga kapunongan lang sila. Wala man ko'y . . . Okey lang kana. Pero akong—gusto kong pamatud-an kana sa inyo, sa pipila ka minuto, nga mga kapunongan lang ang mga niini. Miyembro ka sa kapunongang Methodist, sa kapunongang Presbyterian, o sa kapunongang Pentecostal, hangtud ingon niana na lang. Oo, um-hum. Mga kapunongan! Kita n'yo? Dili ninyo . . . Kita n'yo? Ang mga kasimbahan sa tinuud lang mga kapunongan na lang kon diin ang mga tawong adunay parehong mga ideya dinha nagakatapok.

<sup>199</sup> Pero ang Iglesia'y Usa ra. Ug dili kamo makapamiyembro nianang Iglesia. Natawo kamo diha Niini. Ug sa dihang natawo kamo diha Niini, miyembro na kamo Niini.

<sup>200</sup> Sama sa akong pamilya. Dugay na akong miyembro sa pamilyang Branham sulod sa singkwenta'y-tres ka tuig. Wala gyud nila ako gihangyo nga magpamiyembro niining pamilya. Ngano man? Dili man nako kinahanglan nga magpamiyembro sa maong pamilya. Natawo man ko nga usa ka Branham.

<sup>201</sup> Ug natawo kamo sulod sa Iglesia. Bueno, kining uban mga kapunongan lang. Nahunahuna n'yo ba kana? Oo, sir.

<sup>202</sup> Usa niana ka adlaw naghabas ko'g sagbot, ug nahunahuna ko ang mahitungod sa, bueno, “Ang halangdong santa iglesiang Katoliko,” sama sa tawag nila niini. Nagpadayon lang ako niadto, sa pagpanghabas.

<sup>203</sup> Ug Adunay nagpahunong sa ako, nga istriktong, miingon, “Ayaw gyud kini tawga nga Ingon niana.” Mitan-aw ko sa palibot. Nagsugod ko sa paghabas pag-usab. Gipahunong na pud ako Niini, nga nagsulti, “Ayaw gyud tawga ang mga niini nga Ingon niana.” Miingon, “Kapunongan lang ang mga niini, sama sa uban pa. Dili sila Iglesia. Adunay usa lang ka Iglesia.” Kita n'yo? Mga miyembro sila sa usa ka kapunongan, tungod kay mahimo man kang magpamiyembro sa usa ka kapunongan. Pero dili ka mahimong magpamiyembro sa Iglesia. Ang Iglesia, natawo ka mismo sulod Niini. Nahimo kang miyembro Niini

pinaagi sa bag-ong Pagkahimugso, dayon usa ka na ka miyembro sa Pamilya, usa ka igsoong lalaki o igsoong babaye diha Niini.

<sup>204</sup> Karon tugoti ninyong mobasa ako sa inyo gikan sa *The Emphatic Diaglott* dinhi, usa ka butang, gikan sa Pinadayag 17:3, ug sa Apocalipsis sa *The Emphatic Diaglott* dinhi. Ug tan-awa ninyo kini, kung giunsa ang pagbasa niini, ug kung unsa—kung unsa nga maanindot gyud ang pagkatandi niana. Pinadayag 16, 17. Bueno. Karon atong basahon dinhi sa kadali. Paminawa n'yo kini, og ayo, Pinadayag 17:3.

*Ug usa sa NIADTONG PITO ka mga Manulonda nga adunay . . . PITO ka Panaksan ang miabut ug nakigsulti nganhi kanako, . . .*

<sup>205</sup> Ginabasa nako sa inyo, gikan sa *The Lexicon*. “Adunay . . .”

*. . . “Umari ka, ipakita ko kanimong PAGHUKOM sa NIADTONG BANTUGAN NGA BIGAON, nga nagalingkod sa ibabaw sa Daghang mga Tubig;*

<sup>206</sup> Ug nahibaloan natong tanan nga ang Vatican kana. Ania aduna kita’y kinutlo dinha sa *Our Sunday Visitor*, gikan sa simbahang Katoliko, nga ginasulti sa ato sa eksakto kung unsa kini. Kita n'yo?

<sup>207</sup> Ug ang tubag ngadto niini, miingon, “Pero kadali lang.” Miingon, “Aduna na man gud og tanan na nga matang sa mga ngalan,” miingon, “nga katumbas sa unom ka gatus ug kanuman ug unom.”

Miingon ko, “Pero kadali lang.”

Miingon, “Ang ngalan mo tingali katumbas man pud sa unom ka gatus . . .”

<sup>208</sup> “Pero,” ang ingon ko, “wala man ako nagalingkod ibabaw sa pito ka bungtod, nga pagaharian ang kalibutan, bisan pa, nakita mo.” Uh-huh! Kita n'yo? Husto kana. Kita n'yo?

<sup>209</sup> [Ginabasa ni Igsoong Branham ang Pinadayag 17:1 gikan sa *The Emphatic Diaglott*—Ed.]

*. . . ipakita ko kanimong PAGHUKOM sa BANTUGAN BIGAON, nga nagalingkod sa ibabaw sa Daghang mga Tubig;*

<sup>210</sup> *Mga Tubig*, Pinadayag 17:15, mao’y “mabagang panon sa mga tawo.” Kita n'yo?

*nga kaniya nagpakighilawas ang MGA HARI SA YUTA, ug ang MGA NAGAPUYO sa YUTA nga nangahubog sa VINO sa . . . iyang PAKIGHILAWAS.*

<sup>211</sup> Karon unsa man?

*Ug ako’y iyang ginatultulan, diha sa Espiritu, ngadto sa usa ka Kamingawan; . . .*

<sup>212</sup> *Ang Emphatic Diaglott* na karon. Kita n'yo?

*. . . ug nakita ko ang usa ka Babaye nga nagasakay ibabaw sa usa ka kolor mapulang Mapintas nga mananap, nga nalukop sa Mga Ngalan Nga Masipad-anon, . . .*

213 Karon, diha sa King James, nagaingon, “nga nalukop sa mga ngalan sa pagpasipala.” Kadali lang, ug kuhaon ko kini dinhi, kadali lang. Pinadayag, ang ika-3. Sige, ania na. Sige. Pinadayag, ang buot kong ipasabot sa 17, dili 7; 17, karon paminawa ninyo sa ika-3 nga bersekulo.

*Ug iya akong gidala diha sa espiritu ngadto sa kamingawan: ug nakita ko ang usa ka babaye nga nagasakay ibabaw sa usa ka kolor mapulang mapintas nga mananap, nga nalukop sa mga ngalan sa pagpasipala, . . .*

214 Ingon niana ang pagkasulti niini diha sa Ingles. Pero sa orihinal nga Griyego gikan sa *The Diaglott* ingon niini ang basa niini, sa Pinadayag 17:3. Paminaw.

*Ug ako’y iyang ginatultulan, diha sa Espiritu, ngadto sa usa ka Kamingawan; ug nakita ko ang usa ka Babaye nga nagasakay ibabaw sa usa ka kolor mapulang Mapintas—Mapintas nga mananap, nga nalukop sa Mga Ngalan Nga Masipad-anon, . . .*

215 Lahi ra kaayo kana, gikan sa “mga ngalan sa pagpasipala” nahimong “mga ngalan nga masipad-anon.” Unsa kini? Ug atong . . . Karon, siya:

*. . . ANG INAHAN SA MGA BIGAON . . .*

216 Kabalo kitang tanan niana. Pero unsa man kini? [Nagaingon ang usa ka igsoon, “Ang iglesiang Romano Katoliko.”—Ed.] Dili n’yo na kinahanglan. . . Bueno, husto kana, siguradong ang iglesiang Romano Katoliko kana. Pero siya’y “nalukop sa mga ngalan nga masipad-anon,” Methodist, Baptist, Presbyterian, Lutheran, tanan nga nanagtawag sa ilang kaugalingon, “mga iglesia sa Dios.” Mga ngalan nga masipad-anon! Daku kaayo ang pagkalahi tali sa “mga ngalan sa pagpasipala” ug “mga ngalan nga masipad-anon.” Ginatawag ang kaugalingon nila, “ang Iglesia sa Dios,” ug ginarepresentar ang ilang mga kaugalingon atubangan sa kalibutan; sa mga pagsalosalong nga nagadula og baraha, ug pag-inom-inom og makahubog, ug kung unsa pa ang ginapangbuhat, ug mga soup supper, ug tanang uban pa, ug tanan nang ingon-ana nga mga matang.

217 Adunay usa lang ka Iglesia. Gikahimugso kamo sulod Niini. Dili kamo makasulod Dinha gawas nga mahugasan kamo sa Dugo sa Cordero ug maselyohan sa Espiritu Santo.

218 Daku ang kalainan tali sa “mga ngalan sa pagpasipala” ug “mga ngalan nga masipad-anon.” Nasabtan ba ninyo? [Nagaingon ang kongregasyon, “Amen.”—Ed.]

219 Namatikdan ko kana karong buntaga sa dihang nagbasa ako dinhi, ang . . . Sa pag-abot ko dinhi, adunay Butang nga nagsulti sa ako, “Umadto ka sa imong lawak. Kuhaon mo ang *The Diaglott*.”

220 Bueno, gisunod gyud nako. Kana lang. Misulod ako. Ug nag-abli ako sa Pinadayag 17. Sa hunahuna ko, “Nganong gusto Mo man nga basahon ko kini?” Nagsugod akong magbasa. [Ginapalagitik ni Igsoong Branham ang iyang tudlo—Ed.] Sa pagkakita nako niini, “Mao gyud.” Mikuha ako og lapis ug gisulat kini. Ingon ko, “Mao gyud kini.”

221 Karon, nagbagulbol sila mahitungod sa akong mga pagsaway og batok sa mga organisasyon. Kanang masipad-anon nga mga ngalan, nga nagapatawag sa ilang mga kaugalingon nga, “mga iglesia sa Dios, ug mga iglesia ni Cristo, ug mga iglesia sa Methodist, ug mga iglesia.” Mga kapunongan lang ang mga niini, dili mga iglesia.

222 Usa ra ang Iglesia, kana mao ang Iglesia ni Ginoong Jesus Cristo. Ug unsa man Kini? Ang mistikal nga Lawas kini ni Jesus Cristo nga nagapamuhat ibabaw sa yuta, nga gilangkoban og miyembro sa bisan unsa niini nga mga kongregasyon, nga mahimong miyembro sa Lawas ni Cristo. Kinahanglan gyud nga gikahimugso ka sulod Niini, dili nga nagpamiyembro ngadto Niini.

223 Ug ang pagpamiyembro sa niining kapunongan, mga ngalan nga masipad-anon, sa niining babaye. Sa niining babaye, sa iyang gahum!

224 Ug makita n’yo na karon kung asa nila ginadala ang tanang mga tawo nga adunay lahi nga mga ideya mahitungod sa relihiyon, ug ipadala nila ngadto sa Alaska. Nakita n’yo na kana. Tungod sa atong lahi gyud nga pagtoo.

225 Ug unsa kini? Ang konseho, ang World Council of Churches ug ang Katoliko ukopado kaayo sa ilang dakung buluhaton nga ginapahigayon sa Vatican karon, didto, kon diin ilang gipaningkamotan. Ug tanan niining mga obispo, ug uban pa, naningkamot gyud sila nga moabot sa usa ka kasabutan, para pakigbatokan ang komunismo. Ang kalibutan nga nagapakigbatok sa komunismo, ug napaingon hinoon sa pagpamiyembro sa Katolisismo.

226 Sama ra kini karon. Ania na kita, sumala sa gisulti ko. Paingon na kita . . . Halos mabangkaruta na kita. Nagapanghulam kita, nagapanggasto og kuwarta karon, sa mga buhis nga pagakolektahon pa lang sa katorse ka tuig gikan karon. Ingon na niana ang atong nadangtan. Kinsa man ang adunay kuwarta sa kalibutan? Ang iglesiang Katoliko. Sa unsang paagi kini ipahulam sa Estados Unidos? Para mapadayon ang mga kompanya sa tabako ug whiskey ug ingon nianang mga butang. Siguradong, ipangutang nila kini gikan

kanila. Pag gibuhat na nila, ginabaligya na nila ang ilang mga katungod sa pagkapanganay, sa walay pagpanuko, ngadto sa iglesiang Romano Katoliko. Nagpahiusa na kita. Matikdi ninyo kini, klaro kaayo, og nga mas tin-aw pa kaysa magbasa og mantalaan. Ania na kini. Kita n'yo?

<sup>227</sup> Sila'y Methodist, Baptist, Presbyterian, ug uban pa, nga nagpatawag sa ilang kaugalingon, “ang Iglesia sa Dios.” Ang Katoliko ug tanan na nianang matang mao ang gahum sa mapintas nga mananap nga puno og masipad-anon nga mga ngalan. Nga ginatawag ang inyong kaugalingon, “ako'y...” Miingon ko...

<sup>228</sup> Miadto ako sa ospital dinhi, dili pa lang dugay, aduna ko'y igaampo nga tawo. Ingon ko, “Mopahigayon kami og...” Ang akong mama kadto. Ingon ko, “Mopahigayon kami og pag-ampo para kang mama.”

Ug ang ingon sa babaye, “Biraha kanang kurtina.”

Ingon pud ko, “Dili ba kamo Cristohanon?”

Ingon niya, “Mga Methodist kami.”

<sup>229</sup> Ingon ko, “Salamat. Nahunahuna ko nga tingali ikaw usa ka magtotoo.” Gibira ko na lang ang kurtina para motabon kanako. Kita n'yo? Busa, kung dili ka Cristohanon, lahi gyud. Kita n'yo?

<sup>230</sup> Pero, “Mga Methodist kami,” pagpasipala kana. Ang mananap nga mapintas, ang mga kaiglesiahian, nga gitawag nga mga iglesia, dili sila mga iglesia. Siguradohon kong nakarekord gyud kini. Oo. Dili sila mga iglesia. Mga kapunongan lang ang mga niini. Nagapamiyembro ang mga tawo sa mga niini.

<sup>231</sup> Pero dili mo mahimong magpamiyembro sa Iglesia sa buhi nga Dios. Gikahimugso kamo sulod Niini, pinaagi sa bautismo sa Espiritu Santo. Ug sa dihang nabautismohan kamo sa Espiritu Santo, kining maligdong nga mga pamatasan giselyohan pasulod sa inyo, pinaagi sa Espiritu Santo, ug busa, “Siya nga gipanganak gikan sa Dios dili magahimong pagpakasala.” “Dili gyud niya mahimo.” Tan-awa. Oh, grabe!

Tibuok adlaw natong puedeng hisgotan kini, dili ba?

<sup>232</sup> Ang Iglesia mao ang mistikal nga Lawas ni Cristo, nga natawo sa Gininhawa sa Dios. Oooh! Nasabtan ba ninyo kini? [Nagaingon ang kongregasyon, “Amen.”—Ed.] Ang Iglesia sa Dios natawo sa Gininhawa sa Dios. Gihuypan sa Dios og Gininhawa ang mga buho sa ilong, ni Adan, sa espirituhanong paagi, ug nahimo siyang buhi nga kalag. Kabalo ba mo nga ang mga pentecostal, o ang tinuod nga pentecostal nga Iglesia, natawo gikan sa Gininhawa sa Dios?

<sup>233</sup> Tugoti n'yong basahon ko sa inyo ang usa ka butang, sa kadali lang nga may kalabotan niini. Tan-awon ko, sa kadali lang. San Juan, nagatoo ko, ang ginapangita ko. Hibaloon nato kung ingon-ana ba ang Iglesia sa Dios, o dili. San Juan, tan-

awon nato, nagatoo ko nga anaa kana sa mga 16, 19; 20. Sige. Dinhi nagatoo ako nga ania na sa ato, dinhi mismo. Sige. Tugoti ninyong basahon ko kini sa inyo, ug tan-awon kung ang Iglesia ba'y natawo sa Gininhawa sa Dios, o dili, sama ni Adan sa sinugdanan. Matikdi ninyo.

*Ug sa pagkahapon nianang adlawa, ang nahaunang adlaw sa semana, sa dihang nasirhan ang mga pultahan ug sa ginatiguman sa mga tinun-an tungod sa kahadlok sa mga Judio, Miabot si Jesus ug mitindog sa taliwala nila, ug miingon ngadto kanila, Ang pakigdait maanaa kaninyo.*

*Ug sa nakapamulong na siya niini, iyang gipakita . . . kanila ang iyang mga kamot ug ang iyang kilid. Kon diin . . . Busa ang mga tinun-an nangalipay, sa dihang nakita nila ang Ginoo. Ug si Jesus . . .*

*Ug dayon si Jesus miingon pag-usab kanila, Ang pakigdait maanaa kaninyo: ingon nga ang akong Amahan mao'y nagsugo kanako, . . . sa maong pagkaagi ako nagasugo kaninyo.*

<sup>234</sup> Matikdi. Ang Amahan nga nagsugo Kaniya misulod Kaniya. Ug si Jesus, pagmosugo Siya og usa ka tinun-an, nagasulod Siya kaniya. Siya rang Usa nga nagsugo; ang Dios.

*Ug sa nakapamulong siya niini, gihuypan niya sila ug miingon . . . Dawata ninyo ang Espiritu Santo:*

<sup>235</sup> Ang Iglesia, natawo gayud sa Gininhawa sa Dios! Sa dihang nahulma na dinha ang sukod sa pagkahamtong, anaa na sa kondisyon niini, nan ang Gininhawa sa Dios giginhawa diha kanila, “Dawata ang Espiritu Santo,” dayon usa na ikaw ka anak sa Dios. Mopamiyembro man kamo sa bisan asa nga gusto ninyo, pero natawo kamo ngadto sa Iglesia sa buhi nga Dios, natawo pinaagi sa Gininhawa sa Dios. Gihuypan sila sa Dios, ug miingon, “Dawata ninyo,” whew, “ang Espiritu Santo.” Oh, pagkanindot! Tan-awa.

<sup>236</sup> Dili nga, “Ari ka ug pamiyembro ka, ibutang n’yo ang ngalan n’yo dinha.” Ug uban nianang soup supper ninyo ug tanan sa kauban pa niini, nagapamiyembro ka sa usa ka kapunongan. Makapamiyembro ka sa usa ka kapunongang Methodist, kapunongang Baptist, kapunongang Presbyterian, kapunongang Katoliko, o kapunongang Pentecostal, bisan unsa nga gusto ninyong pamiyembrohan, pero kapunongan ang inyong ginapamiyembrohan.

<sup>237</sup> Pero sa dihang nahimo kang anak sa Dios, natawo ka pinaagi sa Gininhawa sa Dios. Amen. Mas maayo nga biyaan na lang nato kini, karon dinha. Sige.

238 Ang Kinabuhi sa Dios anaa usab sa inyo kung ingon niana, ang ingon ni Jesus. Kadali lang. Ang ingon ni Jesus, “Ako mao ang Punoan sa paras. Kamo mao ang sanga.”

239 Karon tan-awa n’yo. Unsa ba’y ilang reklamo kang Jesus? Ang reklamo nila kang Jesus, tungod kay Siya usa ka Tawo nga ginahimo ang Iyang Kaugalingon nga Dios. Dios man gud Siya. Ang Dios anaa kang Cristo. Kita n’yo? Ug gisultihan Niya sila. Ang ingon Niya, “Ug ayaw pagtan-aw Kanako. Dili kini Ako. Ang Akong Amahan kini, ug Siya nagapuyo sulod Kanako.” Oh! Kita n’yo?

240 Karon, nagatan-aw sila niadtong gamay’ng lawas nga natawo ni Maria. Kita n’yo? Dili man kadto ang Dios. Mao kadto ang Anak sa Dios, pero ang Dios anaa sa sulod niadtong Lawas. Dios kadto. Ang ingon Niya, “Kung wala Ko ginabuhat ang mga buhat sa Akong Amahan, kung ingon niana hukman ninyo Ako. Pero kinsa ba sa inyo ang makahukom Kanako sa sala, sa dili-pagtoo sa Pulong? Unsa man nga Pulong ang gisulti sa Dios nga wala matuman Kanako?” Ang sala mao ang dili-pagtoo. “Kinsa man kaninyo ang makapasangil nga Ako nakasala?” Ang sala mao ang dili-pagtoo. “Ipakita Kanako. Kung wala Ko ginabuhat ang mga buhat sa Akong Amahan, kung ingon niana dili ninyo Ako toohi. Pero kung Akong ginabuhat ang mga buhat sa Akong. . . Kung dili kamo makatoo Kanako, toohi ninyo ang mga buhat nga Akong ginabuhat, tungod kay ang mga niini man ang nagapamatuod.” Sa laktod nga pagkasulti, “Ang Amahan ania Kanako, nga ginapanghimatuod ang Iyang Kaugalingon.” Tungod kay, “Ang Dios atua kang Cristo, nga ginapasig-uli ang kalibutan ngadto sa Iyang Kaugalingon.” Nasabtan n’yo ba? [Nagaingon ang kongregasyon, “Amen.”—Ed.]

241 Bueno, karon, ang mao ra nga Kinabuhi nga anaa sa Punoan sa paras atua usab sa sanga. Unsaon ninyo pagpamiyembro Niana? Dili gyud kini mahimo.

242 Nakakita ko og usa ka kahoy dili pa lang dugay, didto sa nataran ni Igsoong Sharrit sa Arizona, nga adunay siyam ka nagkalain-laing bungang citrus diha niini. Unsa man kadto? Usa kadto ka—usa kadto ka punoan sa orange, usa ka navel orange. Pero aduna kadto og—aduna kadto og—og lemon, tangerine, tangelo, ug kahil. Aduna kadto og tanan na nga klase. Mitindog ko, nga nagtan-aw niadtong kahoy. Ug miingon ko, “Igsoong Sharrit, ang buot mo bang ipasabot sa ako nga kanang kahoya usa ka punoan sa orange?”

Ingon niya, “Ingon gyud niana.”

243 Ug miingon ko, “Bueno, giunsa man? Unsa man diay ang nahitabo?” Miingon ko, “Nakita nako nga may kahil *dinhi*, ug may tangerine pud *dinha*, tangelo *dinhi*, ug lemon *dinhi*, ug tanan na nianang mga bunga. Giunsa man niana pagkahitabo?”



Ingon niya, “Buena, nakita mo, gipangsumbak man gud kana sila.”

<sup>244</sup> “Oh!” Miingon ko, “Buena, gusto kong pangutan-on ka og usa ka butang. Karon, pagnaharbes mo na kining kahil ug ang lemon. Karon, pagkasunod tuig, unsa ma’y bunga? Ang ibunga na siguro mao’y orange gikan niana.”

“Oh, dili.” Miingon, “Lemon gihapon ang ibunga niana. Kita mo?”

“Oh,” miingon ko, “salamat.” Kita n’yo?

Dili ninyo kadto mahimo. Dili kamo puedeng magpamiyembro.

<sup>245</sup> “Pero,” ang ingon niya, “sa matag tuig nga kana nga kahoy moguwang ug magpasalingsing og bag-ong sanga, orange na ang igabunga niana, kung ang maong punoan magpasalingsing og iyahang sanga mismo.”

<sup>246</sup> Ug ang ginabuhat man gud nato mao ang magpamiyembro og mga miyembro ngadto Kaniya, ug nagakinabuhi kita ilalum sa ngalan sa Cristianismo. Tungod kay, kita, sa yanong pagkasulti kita ang bungang citrus, ang Iglestang Cristohanon.

<sup>247</sup> Pero sa dihang ang Punoan Mismo magapasalingsing na, mamahimo kining sama gayud sa unang Punoan nga gipasalingsing Niini. Niadtong gisalingsing Kini sa nahaunang Punoan, ilang nasulat ang Libro sa Mga Buhat tungod Niini; kung magpasalingsing Kini og usa pa, magsulat Kini og usa na usab ka libro sa mga buhat sa likod Niini. Husto.

<sup>248</sup> Busa, nagapamiyembro lang kamo sa mga kapunungan. Pero sa dihang natawo kamo gikan sa Punoan. . . Aduna gyud kamo’y bunga. Husto kana. Aduna gyud kamo’y bunga, pero unsa na ma’y ginabuhat ninyo niini? “Aduna mo’y dagway sa pagkadiosnon, ug ginapanghimakak ang gahum niini.” Ginapanghimakak ninyo ang mga ilhanan. Ginapanghimakak ninyo ang mga katingalahan. Ginapanghimakak ninyo ang Espiritu Santo. Ginapanghimakak ninyo ang pagsulti’g ubang mga pinulongan. Ginapanghimakak ninyo ang mga panan-awon. Ginapanghimakak ninyo ang mga propesiya. Ginapanghimakak ninyo ang pagpang-ayo. Ug, bisan pa niana, “Ginatawag ninyo ang kaugalingon ninyo og usa ka ngalan.” Dili ikatingala nga gisulti sa Espiritu Santo, “Usa ka gahum, sa katilingban sa mga tawo, nga puno og mga ngalan nga masipad-anon, oo, ginatawag ang ilang mga kaugalingon, ‘mga Cristohanon.’” “Nga may mga dagway sa pagkadiosnon, pero ginapanghimakak ang gahum niini. Sa mga niini pahilayo kamo, tungod kay mao kini ang nagapamihag sa mga mahuyang nga kababayen-an nga nahimug-atan sa nagkalain-laing mga pangibog.”

249 Tanan nga klase sa organisasyon! Ang iglesia puno na kaayo, og *ingon niini* nga matang sa katilingban, ug *ingon niana* nga matang sa katilingban. Unsa man pud ang katilingban ni Jesus Cristo? Kita n'yo? Dala-dala nato kining tanang uban pang mga butang, ug gipabug-atan lang nato ang iglesia. Karon mao kana.

Dili gyud ninyo sukad mahimo nga magpamiyembro sa Iglesia.

250 Nagapamiyembro kamo sa kapunongan. Miyembro kamo sa usa ka kapunongan, sa usa ka pundok sa mga tawo, sama lamang sa usa ka kapunongan. “Nagatoo kami sa *ingon niini*. Aduna kami og mga orden. Aduna kami og mga pagsekreto, ug uban pa.” Ingon niana pud ang ginabuhat ninyo, nagapamiyembro lang kamo sa usa ka gitawag nga iglesia.

251 Pero dili ninyo mahimo ang magpamiyembro sa Iglesia. Ang ginapamiyembrohan ninyo mao'y kapunongan sa mga miyembro, pero dili sa usa ka Iglesia, tungod kay natawo man kamo niana nga Iglesia ug sa maong Punoan Mismo.

252 Karon kadali lang. Tan-awa. Papahaman na ako, gamay na lang. Matikdi. Pasayloa ko. Ako—wala ko gituyo nga isulti ang ingon niana. Bantayi. Tan-awa ninyo.

253 Kung gihimo sa Dios nga kining Pangasaw-onon mahiusa sa niana nga Espiritu, nan ginahimo pud Niini ang indibiduwal nga mahiusa niana nga Espiritu, kita n'yo, kung ingon niana natawo na kamo pasulod niana nga Gingharian. Ug dayon ang mismong Kinabuhi nga anaa *niini* nga Iglesia, anaa pud *niana* nga Iglesia, ug *Niana, Niana, Niana, Niana*. Ug ang mismong Kinabuhi nga anaa sulod sa tipaka, sa Punoan, kang Jesus, anaa usab sa miyembro nga Iyang gipamunga. Himaya! “Ang mao rang mga butang nga Akong ginabuhat, ang mga buhat nga Akong ginabuhat, pagabuhaton usab ninyo.” Ingon niana ang tinuod nga miyembro sa Lawas ni Cristo, walay unsa man nga matang sa ngalan ang nakapilit Niini. Ang mismong mga buhat sa maong indibiduwal nagapamatudod kon diin siya naggikan. Ang iyang kinabuhi nagapamatudod kung unsa siya.

254 “Miyembro ba kamo sa unsa? Kabahin kamo sa unsa man nga lawas?” Lawas ni Cristo. “Bueno, asa kamo nagpamiyembro Niini?” Wala ako nagpamiyembro. Natawo ako sulod Niini. Kita n'yo? Natawo ako sulod Niini.

255 Dili n'yo na kinahanglan nga isulti sa ila. Kabalo sila kung unsa ang nahitabo. “Ikaw, puede ba diay nga modagkut ka og lamparahan ug takluban ra gihapon kini og taksanan?” Ingon Niya. Kita n'yo? Dili, dili.

256 Sa dihang natawo na kamo ngadto nianang Gingharian sa Dios, nan ang Kinabuhi, ang mismong Kinabuhi nga anaa kang Jesus. Mao nga interesado na kamo sa mga kalag. Dayon dili na mo kinahanglan nga magpakilooy pa sa mga tawo, nga moduol ngadto sa altar. Dili na mo kinahanglan nga

magpakilooy pa para sa uban, nga moduol og mangita duyog sa kadtong mga anaa na sa altar. Oo. Ang—ang—ang—ang ingon nianang mga butang basta na lang nga modagayday, tungod kay naselyohan na Kini sa sulod ninyo. Usa na kamo ka yunit sa Dios. Naselyohan na kamo sa Espiritu Santo.

Karon ang “Espiritu Santo” nahibaloan ba ninyo kung unsay kahulogan Niini?

<sup>257</sup> Ang kahulogan Niini dili og, “Nakalukso ako ug nakasinggit. Aduna ko’y nabati nga talagsaon.” Hinoon maayo man kana. Nakalukso man ako ug nakasinggit, ug adunay nabati nga talagsaon. “Nakasulti ako’g ubang mga pinulongan.” Nagatoo man ko nga ang Espiritu Santo nagasulti’g ubang mga pinulongan. Sigurado. “Gihubad nako.” Oo, sir. Nagatoo man pud ko, niana. Pero dili man ingon niana Kini. Dili kana ang akong ginahisgotan. Mahimong adunay liki dinhi sa kung asa man. Mahimong adunay liki *dinhi*, diha sa imong pagpailub.

<sup>258</sup> Pag-gisagpa mo diha sa usa ninyo ka aping, sa nawong, maitaon mo kaha ang pikas aping? Pero pagmosulti ka og, “Kana gyud nga hugawan nga hipokrito!” Kung ingon-ana aduna gyu’y liki, sa kung asa man, nga napukaw. Mas maayo kung biyaan na lang nato kana. Sige. Pero kabalo na mo sa buot kong ipasabot.

<sup>259</sup> Apan kung kamo naselyohan na ngadto sa Lawas ni Cristo, nan puno kamo sa Espiritu, ug kamo’y anak na sa Dios.

<sup>260</sup> Oh, unta aduna pa ko’y napulo ka minuto, para basahon ang usa ka butang dinhi. [Nagaingon ang kongregasyon, “Sige lang. Basaha kana, igsoon.”—Ed.] Pero maagwanta pa ba ninyo ang dugang nga napulo ka minuto? [“Oo.”] Gusto kong basahon ang usa ka butang, gamay na lang. Karon, sa tinuud lang, dili pa naman masunog ang mga batong. Ginapasalig ko sa inyo, kita n’yo, kung basahon lang nato kini sa kadali. Pagkaanindot niini para ipalagpas. Aduna ko’y duha ra ka butang dinhi, nga kalit lang misulod sa akong hunahuna, nga gusto kong isulti.

<sup>261</sup> Mag-abli kita sa San Juan, sa ika-3 nga kapitulo, nga ginahisgotan dinhi ang mahitungod sa Kinabuhing Walay Katapusan. Tan-awon nato kung unsay ginasulti Niini dinhi mahitungod niining hilisgotan nga Kinabuhing Walay Katapusan, nga Kinabuhi sa Dios. Bueno, karon tan-awa ninyo dinhi.

*Adunay usa ka tawo sa mga Fariseo, nga ginganlan si Nicodemo, usa ka punoan sa mga Judio:*

*Usa ka gabii niana miadto pud siya kang Jesus, ug miingon kaniya, Rabbi, nasayod kami nga ikaw usa ka magtutudlo nga pinadala gikan sa Dios: . . .wala gayu’y tawo nga makahimo niini nga mga milagro . . .gawas lamang kon ang Dios anaa uban kaniya.*

262 Karon, sila, sila sa konseho sa Sanhedrin, naila nila nga si Jesus mao ang Anak sa Dios. Nasayod sila niini. Ania ang ilang magmamando dinhi mismo, nga ginasulti kang Jesus, “Nasayod kami nga Ikaw usa ka Magtutudlo nga pinadala gikan sa Dios, tungod kay ang mismong Kinabuhi sa Dios nagadagayday pinaagi Kanimo.” Kita n’yo? “Nasayod kami nga ang pagtulonan Mo dili sa Imong Kaugalingon. Iya kini sa Dios, tungod kay ginapamatud-an Kini sa Dios.” Kita n’yo? “Ang Kinabuhi sa Dios nagadagayday mismo pinaagi Kanimo.” Karon matikdi ninyo.

*Si Jesus mitubag ug miingon kaniya, Sa pagkatinuod, . . . nagaingon ako sa inyo, Gawas nga ang tawo matawo pag-usab, dili siya makakita sa gingharian sa Dios.*

263 Oh, grabe! “Gawas ba nga mopamiyembro ka sa akong iglesia”? Oh! Nakita ninyo kung unsa na sila ka halayo Niini? Kita n’yo? Kita n’yo?

*Si Jesus, dayon si Jesus mitubag, Sa pagkatinuod, sa pagkatinuod, magaingon ako sa inyo, Gawas nga ang tawo matawo sa tubig ug . . . Espiritu, dili siya makasulod sa gingharian sa Dios.*

*Ang gianak sa . . . unod man; ug ang gianak sa . . . Espiritu man.*

*Ayaw kahibulong sa akong ginasulti sa inyo, Ikaw kinahanglan nga matawo pag-usab.*

*Ang hangin mohaguros sa kung asa niya buot, . . . Kita n’yo, ginabalikan pag-usab, kita n’yo, nagabalik pag-usab, kita n’yo.*

*Ang hangin mohuros sa kung asa niya buot, . . . inyong dili madungog ang tingog . . . madungog sa tingog niini, apan mahimong dili mo mahibaloan kon diin kini nagagikan, o kung asa kini paingon: mao man usab ang tanan . . . natawo sa Espiritu.*

*Si Nicodemo mitubag ug miingon ngadto kaniya: Unsaon pagkahimo niining mga butanga?*

*Si Jesus mitubag ug miingon ngadto kaniya: Ikaw ba usa ka magtutudlo sa Israel, ug wala makahibalo niining mga butanga?*

264 Tan-awa ninyo dinha, igsoon, usa—usa ka D.D., Ph.D., double-L.D., kita n’yo, “Ug wala mahibalo niining mga butanga?”

*Sa pagkatinuod, . . . Ako moingon kanimo, Kami nagsulti nga among nahibaloan, ug nagapamatuod niana nga among nakita; ug ikaw wala modawat sa among pagpamatuod.*

265 “Nasayod kami niining mga butanga. Nakita namo sila. Nahibalo kami Niini, ug wala gani ninyo ginadawat ang among pagpamatuod.” Nagapasakup ra man gud sa iglesia! Kita n’yo?

*Kung gisuginlan ko man kamo og yutan-ong mga butang, ug kamo wala motoo, unsaon ninyo pagtoo, kung sultihan ko kamo. . . langitnong mga butang?*

266 Karon paminawa ninyo kini dinhi. Matikdi.

*Ug walay tawo nga nakasaka sa langit, kondili ang nanaug gikan sa langit, bisan ang Anak sa tawo nga anaa sa langit.*

267 Hunahunaa gyud kana.

268 Kabalo mo, usa niadto ka higayon, Siya miingon, “Unsay hunahuna ninyo mahitungod kang Cristo? Kang kinsa man Siya nga Anak?”

Sila miingon, “Anak ni David.”

269 Miingon Siya, “Kung ingon-ana nganong si David, diha sa Espiritu, nagaingon ngadto Kaniya, ‘Ang Ginoo miingon sa akong Ginoo, ‘Lumingkod Ka sa Akong toong kamot?’? Unsaon man Niya pagkahimo nga Ginoo Niya ug Anak Niya?’ Mao nga wala na’y tawo nga nangutana pa Kaniya.

270 Diha sa Pinadayag, Siya miingon, “Ako ang Gamut ug ang Kaliwat ni David.” Kita n’yo? “Ako mao ang Punoan sa paras ug ang Sanga. Ako ang sinugdan. Ako na sa wala pa ang sinugdan. Ako ang sinugdan, ug—ug Ako mao ang Kaliwat Niya, usab.”

271 Karon, ania ang ingon Niya, “Walay tawo ang nanaug gikan sa Langit, kondili ang Anak sa tawo nga karon anaa sa Langit.”

272 Usa ka babaye nangutana sa ako, usa niana ka higayon, og usa ka pangutana. Miingon ko, “Tubagon mo kining usa ka pangutana para sa ako.”

Miingon, “Kang kinsa ba nagaampo si Jesus, didto sa tanaman sa Getsemani?”

273 Miingon ko, “Kinsa man diay ang Iyang gihisgotan sa dihang Siya miingon, ‘Walay tawo nga nakasaka sa Langit, kondili Siya nga nanaug gikan sa Langit, bisan ang Anak sa tawo nga anaa sa. . . nga karon anaa sa Langit?’ Kang kinsa?”

274 Atua Siya, nga nagatindog didto ibabaw sa balay, nagapakigsulti kang Nicodemo, ug miingon, “Ako nga anaa sa Langit.” Husto kana? Laktawan na lang una nato kana hangtud unyang gabii. Unsa ma’y ikasulti ninyo? [Nagaingon ang kongregasyon, “Amen.”—Ed.] Nalangan na gyud ta og ayo. Oh, grabe! Ipapamalandong ko usà kamo og diyutay mahitungod niana, unyang hapon.

275 Unsaon n’yo pagpakasulod sa Iglesia? [Nagaingon ang kongregasyon, “Matawo.”—Ed.] Matawo. Pinaagi sa unsa? Sa Gininhawa sa Dios.

Breathe on me, breathe on me;  
Spirit of the living God, breathe on me.

276 Mao kana ang akong pag-ampo: paginhawaa lang kaninyo ang Balaang Espiritu. Oh, grabe! Tungod kay, ang Gininhawa sa Dios, unsa man Kini? Giselyohan na ngadto sa Ginghamarian sa Dios, sa pagkasayod nga, sa una kong pagsugid, nagatoo ako kang Jesus Cristo. Oo.

Dayon, sa akong Pagtoo, akong ipuno ang maligdong nga batasan, diosnong batasan.

Dayon sa akong maligdong nga pamatasan, akong ipuno ang kahibalo sa Pulong.

277 Sa akong kahibalo, akong ipuno ang pagpugong sa kaugalingon, pag-kontrol sa kaugalingon. Ganahan ko niana. “Ang nasud ko para sa imo, purongpurongi ang akong kalag og pagpugong sa kaugalingon, gikan sa dagat hangtud sa nagasidlak nga kadagatan.” Kita n’yo?

278 Pagpailub. Oh, grabe! Gisulayan. Ayaw kabalaka; Ihapon ni Satanas ang mga niini sa imo. Pasaka na ako sa hagdanan karon. Kita n’yo? Gipuno ko na ang maligdong nga batasan, kahibalo, pagpugong sa kaugalingon, karon kinahanglan kong ipuno ang pagpailub. Wala pa gihapon ako og Espiritu Santo.

279 Dayon pagkahuman nakong ipuno ang pagpailub, akong ipuno ang pagkadiosnon. Kabalo ba mo kung unsa kana? Sama na sa Dios. Ipuno mo kana. Dili na ako badlongon. Nagakinabuhi na ako nga sama sa angay buhaton sa usa ka Cristohanon nga lalaki. Dili nga pagpakaaron-ingnon lang. Aduna sa kung unsang Butang sa sulod nako, ang gugma sa Dios, nga nagaawas-awas. Kita n’yo? Kita n’yo? Dili nga moingon, “Uh-uh-uh-uh, grabe, puede ko man unta kadto buhaton, pero mas maayo tingali nga dili na lang.” Kita n’yo? Huh-uh. Huh-uh. Anaa ra diay kini sa gihapon, dinha.

280 Usa kini ka pagkahimugso. Natawo ako pasulod ngadto *niini*, ngadto *niini*, ngadto *niini*, ngadto *niini*, ngadto *niini*, ngadto *niini*, ngadto *niini*. Ug dayon ang gugma sa Dios, si Cristo, mikanaug ug giselyohan ang tanan sulod kanako, para sa pagpangalagad. Kita n’yo?

281 Dayon unsa man ang ginabuhat Niya paggihatag na Niya sa ako ang Espiritu Santo? Ginapahimutang ka Niya sa usa ka linain nga lugar nga ikaw lang, ginamarkahan ka. Kita n’yo? Ikaw usa na ka lahi nga tawo kung ingon-ana. Dili ka na iya sa kalibutan, dili na. Kita n’yo? Lahi na ang imong binistihan. Ang binistihan mo lahi na. Dili kining panggawas ra nga sinina. Dili, dili. Dili mo kinahanglan nga magpakasalikwaut ug magpakalahi, ug pinatindog ang kuwelyo, ug taas nga seremonya, og ingon niana. Dili, dili. Dili mo kana ginabuhat. Nagabisti ka, sa pisikal, nga sama niini. Ang espirituhanon nga

sinina ang mao'y mahinungdanon. Ang bisting pangkasal gisul-ob na diha kanimo. Unsa na ka?

<sup>282</sup> Sama kang Jesus, matikdi, gilandongan Siya, ug Siya nausab ang dagway didto sa atubangan nila, ug ang Iyang bisti misidlak nga sama sa adlaw. Atua Siya, si Jesus, ang Dios nga ginabutang sa posisyon ang Kaugalingon Niyang Anak. Kita n'yo? Ug dayon mitungha si Moises. Dayon mitungha si Elias. Ug ang ingon ni Pedro, "Kabalo mo, kini—kini usa ka maayong butang nga maania dinhi." Nakita n'yo na ang paagi sa tawo? Oo. Oh, sa dihang gibuhat ang supernatural! Miingon, "Magtukod kita og tulo ka tabernakulo. Magtukod kita og usa para kang Moises, ug ang usa para kang Elias, ug ang usa para sa Imo."

<sup>283</sup> Ug sa wala pa siya makahuman sa pagsulti, gipahunong sa Dios ang maong tibuok butang, miingon, "Kini mao ang Akong Anak nga hinigugma. Ang tanan niining mga butanga nga Akong gimando kaniadto kang Moises, ug gipahamtang ang Kasugoan pinaagi kang Moises; ang hustisya pinaagi sa mga propeta; Gituman Niya kini tanan. Patalinghugi ninyo Siya. Mogawas na Ako sa eksena karon. Patalinghugi gyud ninyo Siya. Patalinghugi gyud Siya." Oh, grabe! Pagkaanindot nga butang!

<sup>284</sup> Dayon, pagnatuman na nato kining mga kwalipikasyon, ug nahimo nang puno sa maligdong nga mga gawi nga iya sa Dios ug sa mga butang nga iya sa Dios, dayon ang Balaang Espiritu mokanaug ug selyohan kita pasulod ngadto sa Ginghamarian. Ayaw kabalaka. Makabalo ang tanan nga nadawat n'yo na Kini. Dili n'yo na kinahanglan isulti, "Bueno, himaya sa Dios, kabalo ko nga naangkon ko na Kini. Nagsulti ako'g ubang mga pinulongan. Himaya sa Dios, kabalo ko nga naangkon ko na Kini. Nagsayaw ko diha sa Espiritu sa makausa." Dili n'yo kinahanglan magsulti og usa ka pulong mahitungod niini. Makahibalo ang tanan nga naangkon n'yo na Kini. Ayaw kamo kabalaka. Oo. Kini magapamatuod mismo para sa Iyang Kaugalingon. Iya mismong ipahibalo kini sa taliwala sa mga tawo.

<sup>285</sup> Panalanginan kamo sa Dios. Malipayon kaayo ako nga maania uban ninyo karong buntaga, nga magkaaduna niining pagpakig-fellowship. Paminaw, ang atong iglesia gamay lang, ug mao nga wala kita'y igong lugar para sa mga tawong nagapanambong dinhi. Dili kita usa ka organisasyon. Nagatoo kita ug nagapakig-fellowship sa matag organisasyon. Nanganhi mo tungod kay gusto n'yong moanhi. Ug kamo, gimahal namo kamo. Ug gusto namo nga ang matag organisasyon, ang matag tawo . . .

<sup>286</sup> Nagatoo ako nga adunay mga tawo sa tanan nianang mga organisasyon nga mga Cristohanon. Mga igsoong lalaki ug mga igsoong babaye sila kang Cristo.

<sup>287</sup> Busa, nga, wala kita'y mga hikot, walay pagpamiyembro, walay butang nga ipabuhat kondili nga Cristohanon lang.

Sama sa ginasulti ni E. Howard Cadle kaniadto, “Wala kita’y balaod kondili gugma, walay libro kondili ang Biblia, walay kredong kondili si Cristo.” Husto kana. Umari kamo ug bisitahi kami. Malipay gyud kami. Ginatoohan namo ang Tibuok nga Ebanghelyo, ang matag tipik sa Pulong. Eksaktong ingon niana ang ginatoohan namo. Wala kami nagadugang ni usa ka butang ngadto Niini, ni nagatangtang man og bisan unsa gikan Niini, o ni nagadugang man og bisan unsang butang nga iya sa organisasyon ngadto Niini. Ginapasagdan lang namo Kini kung unsa lang gyud Kini. Mao kana. Ug malipayon gyud kami kanunay sa pagdawat kaninyo. Umari kamo ug makighiusa uban namo kung mahimo ninyo. Nagaampo kami para sa mga masakiton. Ginatoohan namo ang tanan nga ginasulti sa Biblia nga buhaton. Among “ginakalimtan ang among kaluyahon, sa luyo, ug nagapadayon kami ngadto nianang dauganan paingon sa langitnong Pagtawag.”

<sup>288</sup> Karon, usa pa ka butang. Itugot n’yo ba nga masulti Kini? Sa miaging adlaw sa buntag. . . Mamatikdan n’yo sa—sa board dinhi, usa ka panan-awon. Aduna ako’y usa ka panan-awon. Mga alas singko kadto, sumala sa nahibaloan sa akong asawa, o alas sais. Bag-o lang ko nakamata. Nibangon mi para iandam ang mga bata sa pag-eskwela.

<sup>289</sup> Nagaabot kini kanako, matag karon ug unya. Ug kamong tanan nahibalo mismo, ang matag usa kaninyo dinhi, nga wala gyud nagakapakyas ang mga niini. Ang mga niini, ang mga niini hingpit gayud. Kita n’yo? Dili gayud mapakyas ang mga niini.

<sup>290</sup> Ug nahunahuna ko nga ako na ang pinakamalipayong tawo nga akong nakita. Nagatindog ako ilalum sa adlaw, a-d-l-a-w, ug—ug ginasangyaw kono nako ang Ebanghelyo ngadto sa usa ka daku, daku kaayo nga kongregasyon.

<sup>291</sup> [Mihunong si Igsoong Branham—Ed.] Gusto lang nako siguradohon nga ginatayp kini.

<sup>292</sup> Usa—usa ka daku, daku kaayong kongregasyon, ug nanaglingkod kono sila didto sa usa ka lasang. Ug ang mga badlis sa adlaw nagasidlak kanila, *dinhi* ug *didto*, samtang nagapaminaw Niini, ginadawat ang Pulong.

<sup>293</sup> Ug ako, sama sa naandan, kanunay nga dugay kaayo, taas kaayo, nagawali og dugay kaayo. Ug taas na kaayo ang pagwali nako, hangtud nga ang kongregasyon gigutom na sa pisikal nga pagkaon. Ug sila, ang uban kanila, gikapoy na. Busa nanggitindog na lang sila, nanggawas na para sa pagkuha og pagkaon, nagsugod sila panggawas.

Miingon ko, “Ayaw. Ayaw.”

<sup>294</sup> Adunay duha man gud og pinaka punto nga gusto nakong lakbitan, gusto nakong lakbitan, sa akong wali. Ug gihatag kadto sa Ginoo kanako. Ug kabalo ang si bisan kinsa nga



magwawali, nga pagnahibalo ka nga ang Dios ang naghatag niini sa imo, nagadilaab gyud ka nga isulti kini sa mga tawo.

<sup>295</sup> Ug nagwali ako didto, Charlie, kutob sa akong mahimo sa pagwali, nga ginalatag mismo kadto, kabalo na mo, ug ginaingon, “Kining tanan nga dagkung mga butang, *kini* ang ginabuhat sa Dios. Tan-awa ninyo *kini*. Ginatugkad Niya ang mga hunahuna sa kasingkasing. Unsa kini? Ang Pulong.” Ug padayon nga ingon niana. Ug, oh, kung mahinumduman ko pa kung unsa kadtong gipamulong ko didto ug kung unsa kadtong teksto ko. Dili ko na mahidumduman kini. Kita n’yo? Pero ukopado gyud ko sa pagwali.

<sup>296</sup> Ug ginatan-aw ko ang akong kaugalingon nga ginabuhat kadto. Ug dayon sa dihang nagatindog ako didto, nagatan-aw, ug nagatan-aw sa akong kaugalingon nga ginawali Kadto.

<sup>297</sup> Ug nagawali ako mismo, sa-kang-kinsa-nga-dili-modawat-niini. Ug pagkataudtaod, mitindog ako, kabalo na mo, ug sa nahunahuna ko, “Himaya sa Dios!” Miingon ko, “Tan-awa n’yo kining katingalahang mga butang, ug *kini, kana!*”

<sup>298</sup> Direktang, namatikdan nako nga ang mga tawo hinayhinay na silang nagutom sa pisikal. Ug para kanila sa espirituwal igo na kadto, busa misugod sila sa pagbiya. Ug ang uban kanila [Nagapanghuy-ab si Igsoong Branham—Ed.] nagsugod na sa pagpangawas.

Sa hunahuna ko, “Unsa ma’y problema sa tanan?”

<sup>299</sup> Ug—ug mitan-aw ako, ug ania ang pipila ka mga batan-ong magtiayon nga nanggawas usab, sa akong kilid. Sa hunahuna ko. . .Miingon ko, “Kadali lang, higala! Kadali lang! Mobalik man kaha mo pagmoabot na ang mga anino sa kagabhion.” Kita n’yo? Miingon ko, “Pamalik mo. Pero tugoti ninyong maihatud ko usà sa inyo kining unang pinaka punto. Asa ba gikan kining tanang butang, nga gipakita ko sa inyo? Asa ba kini gikan?” Miingon ko, “Ania ang mga niini. Ang mga niini anaa sa Pulong sa Dios. Ang mga niini MAO KINI ANG GINAINGON SA GINOO, Iyang saad. Tungod kay,” ingon ko, “kamong tanan nakasaksi mismo, saksi niini, nga ang sugo sa ako mao ang, ‘Magpabilin sa Pulong.’” Miingon ko, “Unsa man ang nahitabo kaninyong tanan? Dili ba ninyo masabtan ang Pulong? Kinahanglan ninyong masabtan Kini.”

<sup>300</sup> Ug ang uban kanila miingon, “Agoy, gusto ko og pipila ka biskwit,” ug ingon niana.

<sup>301</sup> Bueno, sa hunahuna lang nako, “Bueno, himaya sa Dios! Kung gusto nila og biskwit, pasagdan na lang sila nga magkuha niini.”

<sup>302</sup> Busa ako—milingi ako. Sa hunahuna ko, “Oh, pero, kabalo ba mo kung unsa? Ang mga anino nagapaubos na, pagkataudtaud, mismo.” Miingon ko, “Dayon, unyang gabii,

kung magtigum pag-usab ang maong kongregasyon, ilatag ko sa ila ang pinaka punto sa mga niini, ug isulti sa ila nga ang mga butang nga nakita nila nga ginabuhat ko makita man diha sa Pulong sa Dios, dili sa kung unsang mitikal nga libro o kung unsa nga organisasyon. Makita mismo kini diha sa Pulong. Kita n'yo? Ang matag tipik niini, anaa sa Pulong, tungod kay gisugo ako para Niana.”

<sup>303</sup> Sa hunahuna ko, “Kabalo na mo, sila, ang matag usa, mobalik man unyang gabii, busa mao kini ang buhaton nako. Pagasubayon ko’g balik, medyo subayon og balik.” Nahibalo na mo sa kadtong paagi nga ginabuhat ko mahitungod niadtong mga kapanahonan sa iglesia ug sa ingon nianang mga butang, isulti pag-usab kadtong gisulti ko na. “Subayon ko kini balik, diha sa Pulong, ug dayon kining halangdon, kahibulongan nga pinaka punto na.” Miingon ko, “Mamahimong maanindot kaayo kini nga kahigayonan! Dalaygon ang Dios!” Ug nakita nako ang akong kaugalingon nga nagkagamay, ug nadungog kanang, “Dalaygon ang Dios.” Nakita nako ang akong kaugalingon nga nagakawala nga nagakawala nga sama *niana*. Ug atua ako, nga nagatindog didto.

<sup>304</sup> Karon, ania ang interpretasyon niini. Kita n'yo? Ang unang butang nga akong nahimo, ang mga butang nga nahimo na, nahimong mistikal ngadto sa mga tawo, kadaghanan kanila. Dili ko buot ipasabot ang Tibuok nga Ebanghelyo ug ang mga balaan sa Dios, pero, ang buot kong ipasabot, kadaghanan sa mga tawo. Ug dili gyud nimo tan-awon ang kalibutan, ang kosmos, ingon nga Mensahe sa Dios. Sa dihang magsangyaw ka ug isulti mo . . .

<sup>305</sup> Sama sa giingon ni Boze, “Kanunay akong . . .” Miingon, “Nagdanggo ako, pila ka tuig na ang milabay, nga—nga ipadala kono ako sa Dios ngadto sa Chicago ug uyugon ang Chicago para sa kahimayaan sa Dios.”

Miingon ko, “Joseph, nahimo na Niya kini.”

“Aba,” miingon siya, “wala pa sila giuyog sukad niadtong kay Moody pa.”

<sup>306</sup> Miingon ko, “Mao ba? Ang ginahisgotan ko mao ang Iglesia. Dili kadtong atua sa gawas nga mga pangsupnod lang. Abog lang kana sa yuta, kanang mga nagalaaglaag sa kadalanan, nakameyk-ap nga mga Jezebel ug tanan na.” Miingon ko, “Kana silang atua sa gawas. Kanang dagkung dugay na nga mga kapunongan ug ingon-anang mga butang nga mangalumpag ug mangatumba dinha sa kadalanan.” Ingon ko, “Ang Iglesia ang ginahisgotan Niya. Ang Iglesia nga nakakita sa kapadayagan mahitungod kang Jesus Cristo nga napadayag, ug naila nila Kini. Mahimong dili sila moabot og kinse gikan sa Chicago. Mahimong dili sila moabot og napulo sa niini nga henerasyon, sa tibuk siyudad sa Chicago, nga nagagikan niini.”

307 Nahunahuna n'yo ba kana? “Sama sa nahitabo kaniadto sa mga adlaw ni Noe, mao usab ang mahitabo sa Pag-abot sa Anak sa tawo, diin walo ka kalag ang naluwas.” Uh-huh. Pila ba diay ang migula sa Sodoma? Nakita n'yo ang buot kong ipasabot? Magduhaduha gani ko og bisan usa ka hakop. Kita n'yo?

308 Pero ang Iglesia Mismo nakadawat sa maong pag-uyog. Naila nila kini. Nasayod sila sa Pulong. Nakita nila ang Pulong sa dihang ginapadayag Kini, ug nasalo nila Kini. Karon tan-awa ninyo kana sa kadali lang, karon.

309 Ug kining unang Mensahe, sa dihang nakita nila Kini, ang tanan naghiusa sa pagsuporta Niini, og miingon, “Oh, himaya sa Dios! Oh, kung makakita lang ko og *ingon niini*, *ingon niana*, ug *uban pa*.” Ug dali silang mohawa, sama sa mao rang paagi sa pagsulod nila. Kita n'yo?

310 Ug karon hunahuna nila, “Bueno, wala ko kabalo. Asa man diay mo magpamiyembro? Kung dili ako mopamiyembro *niini*, ingon *niini* ang mahitabo. Ug palagputon ko, dinhi, ug mawalaan gyud ako *dinhi*.” Molvingkod ang kaigsoonang mga lalaki ug moingon, “Bueno, unsa na lang ang buhaton ko kung akong . . .?” Nakita n'yo na? Dili man gud sila mohunong og dugay-dugay para maila unta nga Kini ang Pulong nga gisaad sa Dios, nga ginapadayag. Kita n'yo? Ug nanghawa sila.

311 Pero, ayaw kabalaka, ang mga anino hapit na, kita n'yo, sa dihang mobalik na ako sa pagmisyon.

312 Nahinumduman n'yo, niadtong miaging gabii, ang mahitungod sa Mensahe nga gihatag Niya sa ako kaniadto sa dihang gibutang ko ang ulohang-bato? Eksakto gayud. Miingon, “Buhaton mo ang buluhaton . . .” Miingon, “Sa paggawas mo sa niini nga panan-awon, basaha ang Ikaduhang Timoteo 4.” Kabalo mo, anaa na kini mismo dinha sa ulohang-bato, trayntay-tres ka tuig na ang milabay.

313 Miingon, “Buhata ang buhat sa usa ka ebanghelist, tumana ang imong pagkaministro. Kay moabot ang panahon nga dili na sila molahutay ang maayong Doktrina; pero uyon sa ilang mga kailibgon magatigum sila og mga magtutudlo, tungod sa mga dalunggan nila nga gikatlan; manghisalaag gikan sa sugilanon . . . gikan sa Kamatuoran ngadto sa mga sugilanon.” Kung wala ba nga nahitabo kana, pulong sa pulong mismo! [Blanko nga bahin sa teyp—Ed.]

314 Pero, hinumdumi ninyo, dayon, niadtong miaging gabii, sa dihang wala ko nabasa ang uban pa niini. Kapin sa trayta ka tuig na ako nga nagwali sa niini nga tabernakulo, wala ni usa ka higayon nga milagpas ako nga sobra niana, ug wala ako kabalo kung ngano.

315 Kanunay ko kining gihunahuna, hangtud, usa niana ka adlaw, nakita nako kon diin gikuha ni Jesus ang Linukot ug nagsugod sa pagbasa, ug gibasa ang katunga sa propesiya,

ug mihunong, ug miingon, didto sa Capernaum, ingon Niya, “Ug niining adlaw, kini nga propesiya natuman.” Ngano man nga wala Niya gibasa ang uban pang nahabilin niadto? Nagpahinungod na man gud kadto sa Iyang ikaduhang Pag-anhi. Kita n’yo?

<sup>316</sup> Ug didto nabasa ko kana, nga wala ko kabalo. Gibasa ko kana, ug didto, sa atubangan ko mismo, sa Southern Pines, South Carolina. Nianang buntaga, nagatindog ako didto, nga nagapakigsulti kang Joseph Boze, nga misandig sa kilid sa usa ka sakyanan, Misantup kini sa ako. [Ginapalagitik ni Igsoong Branham ang iyang mga tudlo—Ed.] Miingon Si Pablo, “Ako. . . Ang tanang tawo mibatok na sa ako. Wala na’y tawo nga akong kauban. Gibiyaan na ako ni Demas; nga gihigugma na kining kalibutana karon. Ug ako karon. . .” Tan-awa n’yo. “Ug ang mananalsal-og-tumbaga nakahimo siya kanako og kadaut.”

<sup>317</sup> Tan-awa n’yo kung unsa tingali ang anaa sa hunahuna ni Demas: “Aba, nakita ko si Pablo kaniadto nga nagwali sa Ebanghelyo ug nagpang-ayo sa mga masakiton. Ug ania siya nga naglingkod, nag-antus, mismo, ginapauban-uban ang usa ka doktor, si Lucas. Sa tanang panahon nga siya mosangyaw, aduna siya’y kauban nga doktor, tawo man unta siya nga nagawali sa Balaang pagpang-ayo. Aba, nakita ko siya kaniadto nga gibutahan ang usa ka lalaki. Miingon, ‘Ang Ginoo magabadlong kanimo, ug ikaw mabuta sulod sa usa ka panahon.’ Ug pasagdan lang ang mananalsal-og-tumbaga nga papahawaon siya sa usa ka tigum. Sa tan-aw ko nawad-an na siya og iyang gahum nga butahan ang mga tawo. Hala ka, nawad-an na siya og iyang gahum sa Balaanong pagpang-ayo. Mitalikod na sa iya ang Dios.”

<sup>318</sup> Wala man siguro mipaingon si Demas sa pagka-kalibutanon, tungod kay si Demas usa man ka. . . Kabalo na mo sa kasaysayan niya. Gikan siya sa usa ka daku, adunahan nga pamilya. Ug gusto niya nga makighugoyhugoy sa uban pang mga tawo.

<sup>319</sup> Pero, si Pablo, ang kabus nga si Pablo. Unsa man kadto? Kanunay’ng ginapahanugotan sa Dios ang usa ka ministerio nga mahimong ingon niana, ug dayon purongpurong kini.

<sup>320</sup> Gipahanugotan Niya nga si Jesus mahiadto sa usa ka kahintang. Tan-awa ninyo didto. Mahimo man Niya ang bisan unsa nga gusto Niya; ug gitugotan ang usa ka Romanong sundalo nga birahon ang Iyang bungot gikan sa Iyang nawong, ug magluwa sa Iyang nawong. [Naga-ilustrar si Igsoong Branham og tunog sa pagluwa—Ed.] Gibunalan Siya. . . Gitabonan og trapo ang tibuok Niyang nawong, ug miingon, “Karon, kabalo Ka, ang ingon nila kanako nga Ikaw usa kono ka Propeta.” Silang tanan nga nanagtindog didto sa palibot adunay dala nga mga tangbo, ug gibunalan Siya sa ulo. [May giigo si Igsoong Branham.]

Miingon, “Karon isulti Mo sa amo kung kinsa ang nagbunal sa Imo.” Nasayod man Siya kung kinsa ang mibunal Kaniya. Uh-huh. Sigurado. Kabalo Siya. Kita n’yo? Pero ang Iyang ministerio hapit na man nga mapurongpurongan.

<sup>321</sup> Kanunay kining nagaabot nianang punto kon diin mora’g ingon na kini ka grabe, grabe na ka huyang, nga halos wala na gyud, dayon purongpurongan kini sa Dios.

Oh Ginoo, ipahitabo kini. Ipahitabo kini, Ginoo.

Iduko nato ang atong mga ulo.

I love Him, I love Him  
Because He first . . .

Karon simbaha ninyo Siya. Nakadawat gyud kita og mabagison nga pagtudlo.

And purchased my salvation  
On Calvary’s tree.

<sup>322</sup> Ipataas nato ang atong mga kamot karon ngadto Kaniya.

I . . .

Karon magmaanaa kamo sa Espiritu, kita n’yo, “Gihigugma ko Siya.”

. . . I love Him  
Because He first loved me.  
And purchased my salvation  
On Calvary’s tree.

<sup>323</sup> Karon, manindog na kita, manindog ang tanan.

Sa atong pangtapos nga kanta, kantahon nato ang unang bersekulo, dayon makiglamanano kita sa usa’g usa; ang ikaduhang bersekulo, kantahon nato kini ngadto sa Dios. Sige. Ug dayon magtapos na kita.

Karon, kantahon nato:

Take the Name of Jesus with you,  
Child of sorrow and of woe;  
It will joy and comfort give you,  
Take It everywhere you go.  
Precious Name, O how sweet!  
Hope of earth and joy of Heaven;  
Precious Name, O how sweet!  
Hope of earth . . . Heaven.

<sup>324</sup> Karon, hinumdumi ninyo kini, karon. Hangyoon ko lang ang usa ka gamay’ng igsoon, dinhi, nga nakauban ko sa lawak kaganina lang gyud; usa—usa ka bililhong igsoon, usa ka misyunero sa Assemblies sa kamingawan dinhi; nalimtan ko lang ang ngalan niya, Hangyoon ko siya, nga magsarado sa pag-ampo pagkahuman natong kantahon kining sunod nga bersekulo:

Dalha ang Ngalan ni Jesus uban kanimo,

Ingon nga usa ka Panagang batok sa tanang lit-ag;  
 Ug sa dihang napalibotan ka sa mga tentasyon,  
 Litoka lang diha sa pag-ampo ang maong  
 Balaan nga Ngalan.

325 Tan-awa ninyo ang mga yawa nga mobiya dayon. Kita n'yo? Karon, hinumdumi ninyo:

Dalha ang Ngalan ni Jesus uban kanimo,  
 Ingon nga usa ka Panagang batok sa tanang lit-ag;  
 Ug sa dihang napalibotan ka sa mga tentasyon,  
 Hunong lang, ug litoka lang diha sa pag-ampo  
 ang maong Balaan nga Ngalan.


326 Tan-awa ninyo kung unsay mahitabo. Sige. Dungan ang tanan.

Take the Name of Jesus with you,  
 As a Shield from every snare;  
 When temptations around you gather, (Unsay  
 buhaton ninyo, karon?)  
 Just breathe that Holy Name in prayer.  
 Precious Name, (Precious Name!) O how sweet!  
 (O how sweet!)  
 Hope of earth and joy of Heaven;  
 Precious . . . , ( . . . ? . . . nakita n'yo ang  
 gamay'ng batang babaye . . . ? . . . ) Oh how  
 sweet! (Duol ngari, palangga.)  
 Hope of . . .

327 Samtang nagatindog ka dinhi: Sa katapusang higayon nga ania ako sa tabernakulo, dinhi (Ang mama sige ang katawa ug ginatudlo ang bata.), kini nga bata adunay panukod-sa-tiil nga puthaw. Ania na siya, nga nagadagan-dagan na dinhi sa palibot, malipayon nga nagdula-dula karon. Dili ba maanindot kana? Dayega ang Ginoo. Karon, tan-awa ninyo dinhi: Palangga, lukso ka ug ipakita sa ila, dinha, kung unsaon nimo pagdagan. Kita n'yo?

Oh, precious Name, (Hinumdumi ninyo,  
 Komunyon unyang gabii, sige.) . . . how  
 sweet!  
 Hope of earth and joy of Heaven;  
 Precious Name, O how sweet!  
 Hope of earth and joy of . . .

328 Karon iduko na nato ang atong mga ulo. Ug hinumdumi ninyo ang mga panerbisyo unyang gabii, karon; ug gabii na sa Komunyon. Ug hinumdumi ninyong tanan nga, kamo, nga mga Cristohanon, ginadapit namo kamo sa pag-anhi ug pag-ambit sa Komunyon uban namo. Nagapaabot kita og usa ka mahimayaong kahigayonan.

<sup>329</sup> Ang atong bililhong pastor, dinhi, si Igsoong Neville, ug . . . Pila ang nagmahal kang Igsoong Neville? Moingon, “Amen.” [Nagaingon ang kongregasyon, “Amen.”—Ed.] Paminaw mo, mga igsoon, paminaw kanako ingon nga inyohang . . . isip usa sa mga pastor dinhi sa tabernakulo: Magpabilin gyud mo kang Igsoong Neville. Pagpabilin kamo uban kaniya. Kita n’yo? Siya usa ka alagad ni Cristo. Pagpabilin uban kaniya. Ang Biblia nagaingon, “Kinahanglan natong tipunon ang atong mga kaugalingon: ug labi na nga makita ninyo nga nagsingabot na kining dautan nga adlaw.” Tambong kamo sa mga panerbisyo, pag-anhi kamo; makigtimbayayong gyud kita ug magpabilin gyud nga dapig sa atong pastor. Kita n’yo? Pagpabilin mismo uban sa . . . 

62-1104M Mga Ngalan Nga Masipad-anon  
Branham Tabernacle  
Jeffersonville, Indiana U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)